

四庫全書

經部

欽定四庫全書卷

禮書綱目卷八十五

婺源江永撰

樂記

樂六

補

凡音之起由人心生也人心之動物使之然也感於物

而動故形於聲

宮商角徵羽雜比曰音
單出曰聲形猶見也

聲相應故生變

樂之器彈其宮則衆宮應然不足樂是以變之使雜也
易曰同聲相應同氣相求春秋傳曰若以水濟水誰能
食之若琴瑟之
專一誰能聽之變成方謂之音

方猶文章也

比音而樂之及

干戚羽旄謂之樂

干盾也戚斧也武舞所執也羽翟羽
也旄旄牛尾也文舞所執也周禮舞師

樂師掌教舞有兵舞有干舞有羽舞
有旄舞詩曰左手執籥右手秉翟

樂者音之所由生

也其本在人心之感於物也是故其哀心感者其聲噍
以殺其樂心感者其聲嘽以緩其喜心感者其聲發以
散其怒心感者其聲粗以厲其敬心感者其聲直以廉
其愛心感者其聲和以柔六者非性也感於物而后動
言人聲在所見非有常也噍蹇
也嘽寬綽貌發猶揚也粗麤也是故先王慎所以感之
者故禮以道其志樂以和其聲政以一其行刑以防其
姦禮樂刑政其極一也

極至也

所以同民心而出治道也

此其所
謂至也

凡音者生人心者也情動於中故形於聲聲

成文謂之音是故治世之音安以樂其政和亂世之音

怨以怒其政乖亡國之音哀以思其民困聲音之道與

政通矣

言八音和否隨政也王藻曰御聲幾聲之上下

宮為君商為臣角為民

徵為事羽為物五者不亂則無怙慝之音矣

五者君臣民事物也

凡聲濁者尊清者卑怙慝敝敗不和貌

宮亂則荒其君驕商亂則陂其臣

壞角亂則憂其民怨徵亂則哀其事勤羽亂則危其財

匱五者皆亂迭相陵謂之慢如此則國之滅亡無日矣

君臣民事物其道亂則其音應而亂荒猶散也故傾也書曰王耄荒易曰無平不陂鄭衛之音亂

世之音也比於慢矣

比猶同也

桑間濮上之音亡國之音也

其政散其民流誣上行私而不可止也

濮水之上地有桑間者亡國之

音於此之水出也昔殷紂使師延作靡靡之樂已而自沈於濮水後師涓過焉夜聞而寫之為晉平公鼓之是之謂也桑間在濮陽南誣罔也凡音者生於人心者也樂者通倫理

者也

倫猶類也理分也

是故知聲而不知音者禽獸是也知音

而不知樂者衆庶是也唯君子為能知樂

禽獸知此為聲耳不知其

宮商之變也八音並作克諧曰樂

是故審聲以知音審音以知樂審樂以

知政而治通備矣是故不知聲者不可與言音不知音

者不可與言樂知樂則幾於禮矣禮樂皆得謂之有德

德者得也

幾近也聽樂而知政之得失則能正君臣民事物之禮也

是故樂之隆非

極音也食饗之禮非致味也

隆猶盛也極窮也

清廟之瑟朱弦

而疏越壹倡而三歎有遺音者矣大饗之禮尚玄酒而俎

腥魚大羹不和有遺味者矣

清廟謂作樂歌清廟也朱弦練則聲濁越瑟底孔也

畫疏之使聲遲也倡發歌句也三歎三人從歎之耳大饗禘祭先王以腥魚為俎實不臠熟之大羹肉清不調

以鹽菜遺猶餘也

是故先王之制禮樂也非以極口腹耳目之

欲也將以教民平好惡而反人道之正也

教之使知好惡也

昔者舜作五弦之琴以歌南風夔始制樂以賞諸侯

夔欲

舜與天下之君共此樂也南風長養之風也以言父母之長養已其辭未聞也夔舜時典樂者書曰夔命女典

樂

故天子之為樂也以賞諸侯之有德者也德盛而教

尊五穀時熟然後賞之以樂故其治民勞者其舞行綴

遠其治民逸者其舞行綴短

民勞則德薄鄭相去遠舞人少也民逸則德盛鄭相

去近舞人多也

故觀其舞知其德聞其謚知其行也

謚者行之迹也

大

章章之也

堯樂名也言堯德章明也周禮闕之或作大卷

咸池備矣

黃帝所作樂名也堯

增修而用之咸皆也池之言施也

韶繼也

舜樂名也韶之言紹也言

舜能繼紹堯之德周禮曰大韶

夏大也

禹樂名也言禹能大堯之德周禮曰大夏

殷周之

樂盡矣

言盡人事也周禮曰大濩大武

天地之道寒暑不時則疾風

雨不節則饑教者民之寒暑也教不時則傷世事者民

之風雨也事不節則無功

教謂樂也

然則先王之為樂也以

法治也善則行象德矣

以法治以樂為治之法行象德民之行順君之德也

夫

民有血氣心知之性而無哀樂喜怒之常應感起物而

動然後心術形焉

言在所以感之也術所由也形猶見也

是故志微噍殺

之音作而民思憂嘆諧慢易繁文簡節之音作而民康樂粗厲猛起奮末廣賁之音作而民剛毅廉直勁正莊誠之音作而民肅敬寬裕肉好順成和動之音作而民

慈愛流辟邪散狄成滌濫之音作而民淫亂

志微意細也吳公子

札聽鄭風而曰其細已甚民弗堪也簡節少易也奮末動使四支也賁讀為憤憤怒氣充實也春秋傳曰血氣狡憤肉肥也狄滌往來疾貌也濫僭差也此皆民心無常之微也肉或為潤

是故先王本之

情性稽之度數制之禮義合生氣之和道五常之行使之陽而不散陰而不密剛氣不怒柔氣不懾四暢交於

中而發作於外皆安其位而不相奪也

生氣陰陽氣也
五常五行也容

之言閉也懾
猶恐懼也

然後立之學等廣其節奏省其文采以繩

德厚

等差也各用其才之差學之廣謂增習之省猶審
也文謂節奏合也繩猶度也周禮大司樂以樂語

教國子興道詛誦言語以樂舞教國子
舞雲門大卷大咸大韶大夏大濩大武

律小大之稱比

終始之序以象事行

律六律也周禮典同以六律六同
辨天地四方陰陽之聲以為樂器

小大謂高聲正聲之類也終始謂始於宮終於羽宗廟
黃鍾為宮大呂為角太簇為徵應鍾為羽以象事行宮

為君商
為臣

使親踈貴賤長幼男女之理皆形見於樂故曰

樂觀其深矣

謂同聽之莫不和敬
莫不和順莫不和親

土敝則草木不長

水煩則魚鼈不大氣衰則生物不遂世亂則禮慝而樂

淫是故其聲哀而不莊樂而不安慢易以犯節流湏以

忘本廣則容姦狹則思欲感條暢之氣而滅平和之德是以

君子賤之也

遂猶成也慝穢也廣謂聲緩也狹謂聲急也感動也動人條暢之善氣使失其所

凡姦聲感人而逆氣應之逆氣成象而淫樂興焉正聲

感人而順氣應之順氣成象而和樂興焉倡和有應回

邪曲直各歸其分而萬物之理各以類相動也

成象者謂人樂

也習是故君子反情以和其志比類以成其行姦聲亂色

不留聰明淫樂慝禮不接心術情慢邪辟之氣不設於

身體使耳目鼻口心知百體皆由順正以行其義

反猶本也

術猶道也

然後發以聲音而文以琴瑟動以干戚飾以羽旄

從以簫管奮至德之光動四氣之和以著萬物之理

奮猶

動也動至德之光謂降天神出地祇假祖考著猶成也

是故清明象天廣大象地

終始象四時周旋象風雨五色成文而不亂八風從律

而不姦百度得數而有常小大相成終始相生倡和清

濁迭相為經

清明謂人聲也廣大謂鍾鼓也周旋謂舞者五色五行也八風從律應節至也百度

百刻也言日月晝夜不失正也清謂蕤賓至應鍾濁謂黃鍾至中呂

故樂行而倫清耳目

聰明血氣和平移風易俗天下皆寧

言樂用則正人理和陰陽也倫謂人

道也故曰樂者樂也君子樂得其道小人樂得其欲以道

制欲則樂而不亂以欲忘道則惑而不樂

道謂仁義也欲謂邪淫也

是故君子反情以和其志廣樂以成其教樂行而民鄉

方可以觀德矣

方猶道也

德者性之端也樂者德之華也

金石絲竹樂之器也詩言其志也歌咏其聲也舞動其容也三者本於心然後樂氣從之是故情深而文明氣

威而化神和順積中而英華發外唯樂不可以為偽

三者

本志也聲也容也言無此本於內則不能為樂也

樂者心之動也聲者樂之象

也文采節奏聲之飾也君子動其本樂其象然後治其飾是故先鼓以警戒三步以見方再始以著往復亂以飭歸奮疾而不拔極幽而不隱獨樂其志不厭其道備舉其道不私其欲是故情見而義立樂終而德尊君子

以好善小人以聽過故曰生民之道樂為大焉

文采樂之威儀

也先鼓將奏樂先擊鼓以警戒衆也三步謂將舞必先三舉足以見其舞之漸也再始以著往武王除喪至盟

津之上紂未可伐還歸三年乃遂伐之武舞再更始以明伐時再往也復亂以飭歸謂鳴鏡而退明以整歸也奮疾謂舞者也極幽謂歌者也

夫樂者樂也人情之所不能免也樂必發於聲音形於動靜人之道也聲音動靜性術之變

盡於此矣

免猶自止也人道人之所為也性術言此出於性也盡於此而不可過

故人不

耐無樂樂不耐無形形而不為道不耐無亂

形聲音動靜也耐古

書能字也後世變之此獨存焉古以能為三台字

先王恥其亂故制雅頌之聲

以道之使其聲足樂而不流使其文足論而不息使其曲直繁瘠廉肉節奏足以感動人之善心而已矣不使

放心邪氣得接焉先王立樂之方也

流猶淫放也文篇辭也息猶銷也曲

直歌之曲折也繁瘠廬肉聲之鴻殺也節奏闕作進止所應也方道也

是故樂在宗廟之

中君臣上下同聽之則莫不和敬在族長鄉里之中長

幼同聽之則莫不和順在閨門之內父子兄弟同聽之

則莫不和親故樂者審一以定和比物以飾節節奏合以

成文所以合和父子君臣附親萬民也是先王立樂之

方也

審一審其人聲也比物謂雜金革土匏之屬也以成文五聲八音克諧相應和

故聽其雅

頌之聲志意得廣焉執其干戚習其俯仰詘伸容貌得

莊焉行其綴兆要其節奏行列得正焉進退得齊焉故

樂者天地之命中和之紀人情之所不能免也

綴表也所以表

行列也詩云荷戈與綴兆域也舞者進退所至也要猶會也命教也紀總要之名也

夫樂者先王

之所以飾喜也軍旅鈇鉞者先王之所以飾怒也故先

王之喜怒皆得其儕焉

儕猶輩類

喜則天下和之怒則暴亂

者畏之先王之道禮樂可謂盛矣

天子之於天下喜怒節之以禮樂則兆民

和從而畏敬之禮樂王者所常興則盛也以上並樂記

雅頌之聲皆發於辭本

於情故君臣以睦父子以親故韶夏之樂也聲浸乎金

石潤乎草木令取怨思之聲施之於弦管聞其音者不
淫則悲淫則亂男女之辨悲則感怨思之氣豈所謂樂
哉故事不本於道德者不可以為儀言不合乎先王者
不可以為道音不調乎雅頌者不可以為樂 賢人之
政降人以體聖人之政降人以心體降可以圖治心降
可以保終降體以禮降心以樂所謂樂者非金石絲竹
也謂人樂其家謂人樂其族謂人樂其業謂人樂其都
邑謂人樂其政令謂人樂其道德如此君人者乃作樂

以節之使不失其和故有德之君以樂樂人無德之君

以樂樂身樂人者久樂身者不久而亡

三略

先王之樂

所以節百事也故有五節

五聲之節

遲速本末以相及中聲

以降五降之後不容彈矣

此謂先王之樂得中聲聲成五降而息也降罷退

於

是有煩手淫聲悞埋心耳乃忘平和君子弗聽也

五降而不

息則雜聲並奏所謂鄭衛之聲

物亦如之

言百事皆如樂不可失節

至於煩乃舍也

已無以生疾

煩不舍則生疾

君子之近琴瑟以儀節也非以悞

心也

為心之儀節使動不過度左氏昭元年

廣博易良樂教也樂之失

奢其為人也廣博易良而不奢則深於樂者也

經解

六

律者何黃鍾蕤賓無射太簇夷則姑洗是也故天子左

五鍾右五鍾

六律為陽六呂為陰凡律呂十二各一鍾天子宮縣黃鍾蕤賓在南北其餘則在東

西

天子將出則撞黃鍾右五鍾皆應

黃鍾在陽陽氣動西五鍾在陰陰氣

靜君將出故以動告靜靜者皆和也

馬鳴中律步者皆有容駕者皆有文御

者皆有數步者周還中規折還中矩立則磬折拱則抱鼓

言聲合於樂體比於禮也

然後大師奏登車告出也

周禮王出入奏王夏

入則

撞蕤賓左五鍾皆應

蕤賓在陰東五鍾在陽君入故以靜告動動者則亦皆和之也

治容貌容貌得則氣得氣得則肌膚安肌膚安則色齊

矣

入故欲其靜也

蕤賓聲狗吠蠃鳴及僕介之蟲皆莫不延頸

以聽蕤賓

皆守物及陰之類也

在內者皆玉色在外者皆金聲

玉色

反其正性也

金聲其事敬

然後少師奏登堂就席告入也

少師佐成太師之事

者此言至樂相知物動相生同聲相應之義也古者帝

王升歌清廟

樂章名

大琴練絃達越大瑟朱絃達越以韋

為鼓謂之搏拊何以也

練絃朱絃互文也越下孔也凡練絃達越搏拊者象其德寬和

君子有大人聲不以鍾鼓竽瑟之聲亂人聲清廟升歌

者歌先人之功烈德澤也故欲其清也

烈業也

其歌之呼

也

呼出聲也

曰於穆清廟於者歎之也穆者敬之也清者欲

其在位者徧聞之也故周公升歌文王之功烈德澤

在廟中嘗見文王者愀然如復見文王故書曰搏拊琴

瑟以詠祖考來假此之謂也

尚書大傳

子語魯大師樂曰

樂其可知也始作翕如也從之純如也皦如也繹如也

以成

語告也大師樂官名時音樂廢缺故孔子教之翕合也從放也純和也皦明也繹相續不絕也成樂

之一終也謝氏曰五音六律不具不足以為樂翕如言其合也五音合矣清濁高下如五味之相濟而後和

故曰純如合而和矣欲其無相奪倫故曰皦如然豈宮自宮而商自商乎不相反而相連如貫珠可也故曰繹如也以成

論語

子曰師摯之始闕雎之亂洋洋乎盈耳哉

師摯魯樂師名摯也亂樂之卒章也史記曰闕雎之亂以為風始洋洋美威意孔子自衛反魯而正樂適師摯在官之初故樂之美威如此 同上 魏文侯問於子夏曰吾端冕而聽

古樂則唯恐卧聽鄭衛之音則不知倦敢問古樂之如

彼何也新樂之如此何也

魏文侯晉大夫畢萬之後僭諸侯者也端玄衣也古樂先

王正樂也

子夏對曰今夫古樂進旅退旅和正以廣弦匏

笙簧會守拊鼓始奏以文復亂以武治亂以相訊疾以

雅君子於是語於是道古修身及家平均天下此古樂

之發也

旅猶俱也俱進俱退言其齊一也和正以廣無姦聲也會猶合也皆也言衆皆待擊鼓乃作周

禮太師職曰大祭祀帥瞽登歌合奏擊拊下管播樂器人奏鼓敔文謂鼓也武謂金也相即拊也亦以節樂拊者以韋為表裝之以糠糠一名相因以名焉今齊人或謂糠為相雅亦樂器名也狀如漆篥中有椎

今夫

新樂進俯退俯姦聲以濫溺而不止及優侏儻獫狁子女

不知父子樂終不可以語不可以道古此新樂之發也

俯猶曲也言不齊一也濫濫竊也溺而不止聲淫亂無以治之獫狁猴也言舞者如獫狁猴戲也亂男女之尊卑

優或為優

今君之所問者樂也所好者音也夫樂者與音相

近而不同

言文侯好音而不知樂也鏗錯之類皆為音應律乃為樂

文侯曰敢問何

如

欲知音樂異意

子夏對曰夫古者天地順而四時當民有德

而五穀昌疾疢不作而無妖祥此之謂大當然後聖人

作為父子君臣以為紀綱紀綱既正天下大定天下大

定然後正六律和五聲弦歌詩頌此之謂德音德音之

謂樂

當謂樂不失其所

詩云莫其德音其德克明克明克類克

長克君王此大邦克順克俾俾于文王其德靡悔既受

帝祉施于孫子此之謂也

此有德之音所謂樂也德正應和曰莫照臨四方曰明勤

施無私曰類教誨不倦曰長慶賞刑威曰君慈和徧服
曰順俾當為比聲之誤也擇善從之曰比施延也言文
王之德皆能如此故受
天福而延於後世也
今君之所好者其溺音乎

言無文王

之德則所好非樂也
文侯曰敢問溺音何從出也

玩習之久不知所由出也
子

夏對曰鄭音好濫淫志宋音燕女溺志衛音趨數煩志

齊音敖辟喬志此四者皆淫於色而害於德是以祭祀

弗用也

言四國皆出此溺音濫淫竊姦聲也燕安也春秋傳曰懷與安實敗名趨數讀為促速聲之誤

也煩勞也祭祀不用淫樂
詩曰肅雍和鳴先祖是聽夫肅肅敬也雍

雍和也夫敬以和何事不行

言古樂敬且和故無事而不用溺音無所施

為

人君者謹其所好惡而已矣君好之則臣為之上行之

則民從之詩云誘民孔易此之謂也

誘進也孔甚也言民從君所好惡進

之於善無難

然後聖人作為鞀鼓柷敔壎篪此六者德音之

音也

六者為本以其聲質也柷敔謂祝敔也壎篪或為篥簾

然後鍾磬竽瑟以和

之干戚旄狄以舞之此所以祭先王之廟也所以獻酬

醕酢也所以官序貴賤各得其宜也所以示後世有尊

卑長幼之序也

官序貴賤謂尊卑樂器列數有差次

鍾聲鏗鏗以立號號

以立橫橫以立武武子聽鍾聲則思武臣

號號令所以警衆也橫充

也謂氣作
充滿也

石聲磬磬以立辨辨以致死君子聽磬聲則

思死封疆之臣

石聲磬磬當為磬字之
誤也辨謂分明於節義

絲聲哀哀以立

廉廉以立志君子聽琴瑟之聲則思志義之臣

廉廉
隅也

竹

聲濫濫以立會會以聚衆君子聽竽笙簫管之聲則思

畜聚之臣

濫之意猶孳聚也會
猶聚也聚或為最

鼓鼙之聲謹謹以立動

動以進衆君子聽鼓鼙之聲則思將帥之臣

聞謹則
人意動作

謹或為歡
動或為勲

君子之聽音非聽其鏗鏘而已矣彼亦有所

合之也

以聲合成已
之志 樂記

平公說新聲

說樂也新聲者衛
靈公將如晉舍于

濮水之上聞琴聲焉甚哀使師涓以琴寫之至晉為平
公鼓之師曠撫其手而止之曰止此亡國之音也昔師
延為紂作靡靡之樂後而自沉于濮

水之中聞此聲者必於濮水之上乎

師曠晉主樂太師子野

君之明兆於哀矣

兆形也

夫樂以開山

川之風

開通也政八音以通八風

以耀德於廣遠也

耀明也

風德以廣

之

風宣其德廣之於四方作樂各象其德韶夏濩武是也

風山川以遠之

遠遠其德也周

禮每樂一變各有所致謂鱗介毛羽之物山林山澤天地之神祇也

風物以聽之

言風化之動物

莫不傾耳而聽

修詩以詠之修禮以節之夫德廣遠而有時節

作之有時動有禮節

是以遠服而邇不遷

國語晉語

太史公曰余每


讀虞書至於君臣相敕維是幾安而股肱不良萬事墮
壞未嘗不流涕也成王作頌推已懲艾悲彼家難可不
謂戰戰恐懼善守善終哉君子不為約則修德滿則棄
禮佚能思初安能惟始沐浴膏澤而歌咏勤苦非大德
誰能如斯傳曰治定功成禮樂乃興海內人道益深其
德益至所樂者亦異滿而不損則溢盈而不持則傾凡
作樂者所以節樂君子以謙退為禮以損減為樂樂其
如此也以為州異國殊情習不同故博采風俗協比聲

律以布短移化助流政教天子躬於明堂臨觀而萬民咸蕩滌邪穢斟酌飽滿以飾厥性故云雅頌之音理而民正噪噉之聲興而士奮鄭衛之曲動而心淫及其調和諧合鳥獸盡感而況懷五常含好惡自然之勢也又曰夫上古明王舉樂者非以娛心自樂快意恣欲將欲為治也正教者皆始於音音正而行至故音樂者所以動盪血脉流通精神而和正心也故宮動脾而和正聖商動肺而和正義角動肝而和正仁徵動心而和正禮

羽動賢而和正智故樂所以內輔正心而外異貴賤也
上以事宗廟下以變化黎庶也夫禮由外入樂自內出
故君子不可須臾離禮須臾離禮則暴慢之行窮外不
可須臾離樂須臾離樂則奸邪之行窮內故樂音者君
子之所養義也夫古者天子諸侯聽鍾磬未嘗離於庭
卿大夫聽琴瑟之音未嘗離於前所以養行義而防淫
佚也夫淫佚生於無禮故聖王使人耳聞雅頌之音目
視威儀之禮足行恭敬之容口言仁義之道故君子終

日言而邪辟無由入也

史記
樂書



禮書綱目卷八十五

欽定四庫全書

經部

禮書綱目附錄

詳校官監察御史臣周

給事中臣溫常綬覆勘

總校官庶吉士臣何思鈞

校對官中書臣金光悌

謄錄監生臣俞鳳

欽定四庫全書

禮書綱目附錄卷上

婺源江永撰

論蔡氏律書

二條

論蔡氏律書未盡善

理之在天下至無窮也智者研之而亦有未精愚者思之而或有一得古人發之已謂詳密無可加後人觀之猶謂罅隙有可議雖曲藝小道莫不皆然而况幽深難知如律呂一事乎古之通於音律者別有暗悟神解此

誠不可思議若夫薈萃古人成說為之梳櫛其條理闡發其寔與曲暢旁通自成一家之言如蔡西山先生律呂本原證辯二篇固為朱子所極取然而理不厭精學不厭辯誠能於古人成說之外別闢一解別創一法似新奇而實為平易似臆說而又有據依此亦先儒之所不禁也永於律呂一事殫思有年竊疑西山先生之書猶有未盡善者自以管見為書二卷非敢必以為是也將俟當世君子論定焉耳

又論

永少讀蔡氏之書沈潛反覆不能贊一辭中年因讀朱子琴律說見其言管絃同理又謂琴有兩角聲此律呂性情自然之變非人之所能為緣此忽有疑焉使蔡氏之書而至當也宜其證之琴家若合符節胡為律書有二變而琴皆正聲律書唯一角而琴有兩角意蔡氏之書猶有不適於用者乎後觀朱子語有云季通不能琴彈出便不可行乃知蔡氏著書未嘗與琴參證也又因

讀前漢律歷志見劉歆有推歷生律一語竊疑律管短
長必有與歷冥符者當求管中積分以合於歷日不當
執定古人三分損益成法也既而考之益詳思之益密
算周黼以求黃鍾之積分推琴徽以求聲律之數度考
古人轉絃換調之法訪俗樂工尺上四之粗乃知音律
別有精微亦別有法度執蔡氏之律書而求合於管絃
無異按圖而索馬刻舟而求劍也蓄之於心二十餘年
衆證皆備衆疑盡豁乃敢筆之於書若理未經深思事

未加詳考僅據片言譌字便欲盡翻前人窠臼如李文利律呂元聲者則永嘗竊笑之又何敢效焉

又論

從來天下事是非當否當以理為斷不當以人為斷當以目前有據者為定不當以古說久遠者為定如律呂一事欲求至是之歸將以人為斷乎則若西山先生者書無不讀學無不窺人之所難彼之所易朱子稱為老友不敢謂在弟子之列者其所著述尚有考之不詳思

之不精貽後人之辯駁者乎且其書實與朱子商確而成蔡氏之書即朱子之書也猶謂不足據信乎如謂以古為定也則蔡氏之書悉本古人成說淮南太史劉歆班固司馬貞孔穎達杜佑皆著述通人其言前後一揆豈尚有遺議乎若破此拘攣之見以理為衡當別有至是之歸理亦虛而難憑唯以目前有據之物如琴者以決之則此理之是非當否亦不難論定矣蔡氏別有歷書未行於世欲以邵子一元之數為日分恐亦不能與

天密合使其書今存豈能舍目前之有據者而唯皇極經世歷是從乎

論五聲二條

論五聲之體本於河圖

天地之間氣而已矣氣動而聲發焉或兩氣相軋而聲出於虛或兩形相軋而聲出於實或形軋氣氣軋形而聲出於虛實之間大小高下皆有數存焉稽之於物金石之屬小而薄者聲濁大而厚者聲清絲絃之屬粗而

長張之而緩者聲濁細而短張之而急者聲清聲皆稟
於器竹管之屬長而寬吹之而緩者聲濁短而窄吹之
而急者聲清聲皆稟於器而器之大小短長粗細寬窄
莫不有數存焉品其清濁高下之次第有五最濁為宮
次濁為商清濁間為角次清為徵最清為羽太清則噍
殺太濁則盭緩五聲者天地之中聲也先王文之而成
樂焉月令曰春其音角其數八夏其音徵其數七中央
土其音宮其數五秋其音商其數九冬其音羽其數六

此即河圖五行之數也五行生出之序一水二火三木
四金五土而土又為五行之主四行皆賴之而成故一
得五成六二得五成七三得五成八四得五成九五復
得五成十而天地之數全矣宮屬土五與十之數也商
屬金四與九之數也角屬木三與八之數也徵屬火二
與七之數也羽屬水一與六之數也五行根於無形之
理故以徵著為次而曰水火木金土五聲稟於有形之
器故以大小為次而曰土金木火水試累十數命為宮

損一則為九為商又損一則為八為角又損一則為七
為徵又損一則為六為羽又損一則為五為少宮於律
為黃鍾之宮於琴為中徽然則河圖之數實五聲之原
知夫五聲之原根於自然之數則其序唯曰宮商角徵
羽而已古法宮生徵徵生商商生羽羽生角意其出於
人為而非數之自然者乎

十九八七六五皆迭減一然
聲陽也用九而不用十故黃

鍾止於九寸寸有九分每聲迭減九分九其九為八十
一宮之初也八其九為七十二商之初也七其九為六
十三角之初也六其九為五十四徵之初也五其九為
四十五羽之初也自是則以九之半乘九得四十零半

分為少宮以九之半乘八得
三十六為少商與舊法異

論五聲之用本於琴徽

五聲既以均齊者為體又以參差者為用體者其界限
也用者其發聲之處也發聲之處何以驗之當驗之於
琴徽琴徽者聲之出於自然者也造化之理有均齊必
有參差如人之耳目手足左右相對均齊者也手之五
指則有參差矣天之二十八宿四維各七均齊者也井
斗度多鬼觜度少則有參差矣琴徽左右相對亦均齊

也自龍齧至十三徽四寸五分十三徽至十二徽一寸
五分十二徽至十一徽一寸三分十一徽至十徽一寸
七分十徽至九徽三寸九徽至八徽二寸六分八徽至
七徽三寸四分此參差者也以均齊者布之一聲三寸
六分商界在十三徽外九分角界在十一徽外一分徵
界在九徽外一寸二分羽界在八徽外二分而用數則
發聲於諸徽

詳見下
卷論琴

用亦不離乎體之外

皆過界而
後發聲

此

造化自然之妙也舊法宮數八十一三分損益以相生

商七十二角六十四徵五十四羽四十八以此較今法
宮商徵合而角羽則差矣

論黃鍾之宮

一條

辯前漢志誤刪呂氏春秋

古人造律所以審音制器為作樂之本律必始於黃鍾
黃鍾之聲又不易定於是先為黃鍾之宮其管四寸五
分其空徑三分寸之一以審定其清聲而後倍之以為
黃鍾之全律蓋古之四寸五分當今之二寸八分有奇

其管甚短自此以下則太清而不可吹古人能以耳齊聲以此定為黃鍾之宮乃倍為之九寸以生大呂以下十一律焉故律必以黃鍾之宮為本呂氏春秋古樂篇述黃帝命伶倫造律其文甚明但字有譌舛耳其云伶倫取竹嶰谿之谷空竅厚薄均者斷兩節間而吹之其長三寸九分以為黃鍾之宮吹曰舍少此即黃鍾半律也半律當言四寸五分而云三寸九分者古四字疊積四畫因誤為三九字亦與五畧相似而譌也唯其黃鍾

之宮異於全律是以下文別云次制十二筒以聽鳳凰之鳴云云明其非十二筒中之黃鍾也班孟堅作志時呂覽本三九字已誤疑其三寸九分無當於律遂刪去此句又刪去吹曰舍少句顏師古遂解黃鍾之宮為最長之律既先為最長之律矣復言制十二筒又有最長之黃鍾豈不為重複乎月令亦呂氏之書也季夏中央土律中黃鍾之宮而仲冬之月又曰律中黃鍾明仲冬所中者全律而中央所中者其半律半律居全律之中

如琴之七徽有中央之象故季夏未當之其適音篇又云黃鍾之宮聲之本也清濁之衷也此如琴四徽為清全絃為濁七徽則其清濁之衷也合此三處考之其為黃鍾半聲無疑矣班氏采呂覽當存其本文而於寸分之誤加擬議可也率爾刪之豈不大失古人之意乎鄭康成註月令亦誤唯蔡邕月令章句獨以黃鍾之宮為少宮為四寸五分之律管最為得之疏家熊氏亦從此但不當言以此候氣耳今猶見於正義可考也由此言

之黃鍾清聲伶倫之所首重後世雖俗樂正宮越調皆必以此起調畢曲譬之人事黃鍾全律人君之象也中央黃鍾之宮帝座之象也尊帝座即所以尊君也皇祐元豐間李照范鎮制樂皆去四清聲則首去此黃鍾之宮矣此聲之最貴者而可去乎蔡氏蔽於通典變律子聲之說謂無黃鍾四寸半之律使其果無伶倫何為首造此耶亦由班氏不能訂呂氏寸分之誤輒刪其文故令後人不復致思耳

蒲田李文利作律呂元聲以闕呂覽三寸九分句為主不思三九

字之誤又不知其為黃鍾清聲別有全律遂謂黃鍾之長本止如此於是以短而清者為尊長而濁者為卑其說甚謬不足與辨 呂覽吹曰舍少四字亦恐有誤一本曰作日又一本舍作舍皆非也竊恐吹字為命字之誤舍字為宮字之誤當作命曰宮少四字宮少即蔡邕所謂少宮也如此則黃鍾之宮為半聲尤明覽者詳之又按管子地員篇云凡將起五音凡首先主一而三之四開以合九九以是生黃鍾小素之首以成宮三分而益之以一為百有八為徵有三分而去其乘適足以是生商有三分而復於其所以是成羽有三分而去其乘適足以是成角此云黃鍾小素之首以成宮亦是黃鍾半律也故其下言三分益一為百有八為徵若是全律則當三分損一為五十四矣全律一百六十二對全律言之故謂之小素其云四開以合九九四當為三亦因古字積畫而誤三開以合九九者三其三為九九其九為八十一也言四開則非矣管子言三分損益雖非

是觀此文可知古人起聲律皆先半黃鍾以為律本正與呂覽之說相發明三之誤為四亦猶四之誤為三又可見三寸九分之為誤文明矣

論黃鍾之長 一條

辨蔡邕黃鍾長尺之非

黃鍾長九寸凡聲屬陽陽究於九故不盈十至用以量須用全數故加一寸為尺蔡邕銅龠銘曰黃鍾之宮長九寸空圍九分其月令章句又云管者形長尺圍寸是黃鍾之長與空圍有兩說謂約黃鍾之九寸為十寸可

也謂古之尺如黃鍾之長恐不然古之黃鍾九寸大約當今工人尺五寸六分有奇使約九為十則寸狹而分亦狹空圍十分恐管徑太狹吹之不成聲又以此算周髀漢斛所容皆不應矣且古者以八尺為中人之長大約今之五尺也若以九約之僅如今之四尺五寸則今時中人亦不止如此故蔡邕之說未確邢雲路信之謂古法十其寸為尺九其寸為律考之不詳耳

論黃鍾之積 三條

論律生於歷

聲無形者從陽而法天其數五倍之為十半為清而半
為濁律有體者從陰而效地其數六倍之為十二律居
陽而呂居陰夫六律六呂之應十二月說者以為埋管
於密室隨月氣應而灰飛其事雖未有確驗要之天有
十二月律有十二管律歷自然相應則其顯然者矣古
人有言曰推歷生律

見前漢
律歷志

夫律何以生於歷哉蓋黃

鍾之積分冥符歷日之數也天以日為主右行一日一

度積之一歲而有三百六十五日四分日之幾一黃鍾之半管積分應之全管則有圓分七百三十分又半分稍弱適符兩歲之期實此律厯所以相通雖未必有氣應灰飛之事而自有默相契合之理猶之人身血脈周流悉應天運而經絡空穴亦有三百六十五數以應天度焉此豈人之所能為哉古今之言律厯相通者皆未思及此漢志雖言推厯生律而以律之八十一分為日法則是因律生厯以數強合并厯亦失之矣邢雲路謂

冬至景長測景以定黃鍾不知景隨地異將以何者為準且夏至景短何以蕤賓之律不最短乎

考周黼定黃鍾積分應再朞

黃鍾積分應再朞之日此說千古所未發其數甚渺茫難信幸有因律生量之法見於前漢志又有臬氏之黼尺度淺深之數見於周禮以周黼之容受求黃鍾空圍內之容分兩歲朞實不約而合夫謂容分應再朞非謂十分為寸之分又非以平方分起算以立方分計積也

蓋聲音屬陽故黃鐘之寸必九而管體之空必圜寸既

以九則分亦當用九而不用十

律以九分為寸史遷以來有此法但假此便於

三分損益耳不知其數本如此

管空既圜則分亦當用圜而不用方此

自然之理也

范鎮曰古者以竹為律竹形本圓而今以方分置算此律非是算法圓分謂之徑圜

方分謂之方斜今圓分而以方法算之此算數非是說正與此合蔡氏謂算家無用圓分之法不知算家用方分取其整齊易算耳律數精微默契天運未可以算家簡便之法推也按考工記臬氏為量

量之以為鬴深尺內方尺而圜其外其實一鬴其鬻一

寸其實一豆

內方尺者虛度之四隅皆抵圍圜其外即方尺之外此皆謂鬴內容受之處鄭註謂

圓其外者為之脣非也脣底也豆即斗字覆其底深一寸容一斗則腹深尺者容十斗可知矣王安石引管子百升成鬴是也鄭注此鬴即十斗之斛出於黃鍾之龠鬴六斗四升非也

內方尺而圓其外既不言有庇旁

庇謂不滿處

則內方四隅

皆抵圓以勾股求弦法推之

勾尺自乘百寸股尺亦自乘百寸合勾股畧二百寸

平方開之得弦弦即圓徑

其徑一尺四寸一分四釐二毫一秒三忽

五微六纖有奇今始以算家十分為寸平方立方算法算

之凡圓率徑一者周三一四一五九三六

祖沖之密率

以半

徑乘半周

徑圓求面畧法

而得面畧七八五三九八四徑十寸

者自乘百寸其園內之冪七十八寸五三九八四今此
鬴之徑自乘二百寸則冪亦當倍之為一百五十七寸
七分九十六釐八十毫一寸有平方百分凡一萬五千
七百七分九十六釐八十毫深一寸有立方一十五萬
七千七十九分六八深一尺有立方一百五十七萬七
百九十六分八十釐此鬴之容方分也因鬴以求黃鍾
一鬴之實容黃鍾二千龠

漢志黃鍾兩龠為合十合為
升十升為斗十斗為斛故一

斛有二
千龠

以二千歸立方得黃鍾之積七百八十五分三

九八四黃鍾九寸當以九十歸之得面幂八分七二六
六四九以面幂求周徑得周一十分四釐七毫一九八
徑三分三釐三分釐之一

胡安定以來謂徑三分四釐六毫者未密

此古黃

鍾圍徑積幂以十起算之數也較之蔡氏九平方分積
八百一十分者不侔矣再以九分為寸并圓分之法推
之即前之徑約十為九得一百二十七分二七九二二
零六約十為九者以九自乘得八一亦如前法倍之得
一六二即為徑幂求園內之園分者徑幂即為園分

如徑

十者圓
分百

得一萬六千二百為平圓分深一尺者九十分

有立圓一百四十五萬八千以二千歸之得黃鍾之積
七百二十九个立圓分以八十一歸之空圓有九平圓
分徑九分寸之三由此觀之則黃鍾之積豈不適合兩
歲之日乎雖兩歲有七百三十零半日弱此積不及一
分有奇然此一分有奇者甚微空徑稍寬毫髮即盈其
數黃鍾稍寬則黼徑亦當稍寬

較寬一釐
四毫四秒

內方尺之四

隅不及抵圓亦當微有庇旁然其數甚微不言亦可且

量器取其整齊足以垂法不妨少減庀處以就內方初
不必計其毫釐也若王莽之斛雖亦出於黃鍾然其造
律或圍徑稍寬於是積分稍多以二千龠登於斛遂有
一千六百二十寸其徑一尺四寸三分六釐一毫九秒
二忽於是內方四隅不抵圍周不得不有庀旁劉歆謂
庀旁九釐五毫而祖沖之以密率計之庀旁一分九毫
有奇則漢斛大於周黼矣蔡氏以漢斛定黃鍾空圍九
分積八百一十分豈知黃鍾之積本應再朞合周黼而

且用九用圓布算者乎

論宋儒算術之誤

算術亦律學之一事當講於勾股少廣開方諸法有宋諸儒言律者如胡安定范蜀公蔡西山皆不精於算術其求周徑也不考祖沖之密率但用圍三徑一之法其求積冪也不以密率實算但用圓田簡約之法今所算皆用密率唯數位之後奇零甚微者乃棄之

論十一律

四條

論律當勻截應節氣

黃鍾半律之容分既當一歲之日則其生大呂以下十一律也亦以四寸有半均勻截之以應月之中氣每律截去三分七釐五毫其中容分三十分有奇猶之自冬至至大寒太陽平行三十度有奇在厯則積而漸多在律則減而漸少至應鍾又截去三分七釐五毫則為黃鍾清聲此天地之氣循環無端之象也舊法以三分損益隔八相生之法生十一律其所生之律忽短忽長無

關於歷日之數至於仲呂不能反生黃鍾遂往而不反豈自然之數法哉

又論

今歷節氣亦有短長此因太陽行本輪有高下故視行小有盈縮節氣微有短長在天本皆平行律分應日亦當稍有參差然其數甚微律管不過毫釐之間即謂均勻截之以應太陽平行之平氣亦可也

今律較舊律

今律大呂八寸六分二釐五毫太簇八寸二分五釐夾
鍾七寸八分七釐五毫姑洗七寸五分仲呂七寸一分
二釐五毫蕤賓六寸七分五釐林鍾六寸三分七釐五
毫夷則六寸南呂五寸六分二釐五毫無射五寸二分
五釐應鍾四寸八分七釐五毫黃鍾清四寸五分舊律
大呂八寸四分一釐七毫有奇少二分七毫有奇太簇
八寸少二分五釐夾鍾七寸四分九釐有奇少三分八
釐有奇姑洗七寸一分一釐有奇少三分八釐有奇仲

呂六寸六分五釐有奇少四分六釐有奇蕤賓六寸三分一釐少四分三釐有奇林鍾六寸少三分七釐五毫夷則五寸六分一釐有奇少三分八釐有奇南呂五寸三分三釐有奇少二分九釐有奇無射四寸九分七釐有奇少二分七釐有奇應鍾四寸七分四釐有奇少一分三釐有奇變黃鍾半律四寸四分三釐有奇少黃鍾清六釐有奇觀舊律皆短於今律夾鍾近姑洗姑洗近仲呂仲呂近蕤賓蕤賓近林鍾林鍾夷則差一律夷則

近南呂南呂近無射以歷日較之差多者一月矣其兩律相減大呂減黃鍾五分八釐有奇夾鍾減太簇五分有奇何其疎南呂減夷則二分八釐應鍾減無射二分三釐又何其密豈天地之氣果如是疎密不均乎或曰五聲之用亦有參差而律獨皆均齊何也曰五聲之有參差也驗於琴徽之泛聲而律管之無參差也應乎黃道之宮度各有攸當不可以彼例此也使謂十二律不應十二月則已如其應十二月也安得舍太陽行度一

月三十之截然者而從夫三分損益忽疎忽密之數乎

論律呂應日躔斗建

陽律陰呂之相合也有自然之理焉亦有自然之數焉
周禮大司樂奏黃鍾歌大呂以祀天神子與丑合也奏
太簇歌應鍾以祭地示寅與亥合也奏姑洗歌南呂以
祀四望辰與酉合也奏蕤賓歌函鍾以祭山川午與未
合也奏夷則歌小呂以享先妣申與巳合也奏無射歌
夾鍾以享先祖戌與卯合也此十二辰之六合說者以

為本於日躔與斗建如日躔星紀丑則斗建元枵子日
躔析木寅則斗建娵訾亥是也以今律黃鍾清四寸半
合大呂八寸六分二釐五毫得十三寸一分二釐五毫
太簇合應鍾姑洗合南呂蕤賓合林鍾夷則合仲呂無
射合夾鍾皆得十三寸一分二釐五毫與大司樂之文
及日躔斗建之說不約而合豈非自然之理數不假絲
毫智力者乎黃鍾全律獨不與呂合而所合者乃其清
聲又隱然有尊君之理寓於律數之間云

論三分損益

八條

辨三分損益上下相生之非

三分損益上下相生之說始於管子至史記律書而加詳班氏律歷志又因史記推演其數後之言律者皆固守其說不知此法果天為之乎凡數之出於自然如河圖洛書如先天八卦如納音五行如揲著如算家勾股乘除諸法是誠非人之所能為若夫聲律之用三分損益竊謂其出於人而非天也律管本應十二月如云黃

鍾三分損一下生林鍾安見六月之積日由十一月下
生而來如云林鍾三分益一上生太簇安見正月之積
日又必由六月上生而至乎明者觀之不待其生至仲
呂不能反生黃鍾固已疑其法之非真矣五聲三分損
益隔四而相生亦得其近似而非其本然古人見其數
之近似也遂立為成法不知小有不合則法已非真如
古之算家但知徑一圍三不知有密率古之厯家但知
一歲小餘四分日之一不知有歲差其事亦正相類後

人於厯算二事已精益精初不必守古人之定法至言律呂獨相沿不改何其膠柱不知變乎

又論

律之三分損益算之徑一圍三厯之十九歲氣朔分齊皆近似不精之法及細考之厯算二法皆不然律法豈得獨是厯則分明有景可測算則分明有器可量律則分明有琴可考三者皆不可誣雖有羲和之厯隸首之算伶倫之律相傳至今亦當以有據者為斷不當法古

法為定如云太史公之說必有所傳則史遷專司星歷其歷書法度當精密不可易矣今太初之法一步不可行又何疑於律乎

又論

細考之古法三分損益其源亦自琴來故謂宮聲為八十一絲商聲為七十二絲皆以琴絃言之琴絃取應聲之法亦畧有三分損益之意如初絃第九徽應四絃散聲九徽當絃三分之二似宮聲三分損一而生徵四絃

九徽應七絃散聲似徵聲三分損一而生少商益一即
是上生商五絃九徽為清角三分益一又似羽聲上生
角然太簇八寸不當十三徽則徵生商三分損一而有
餘姑洗七寸一分亦不正當十一徽則羽生角三分益
一而不足商生羽從十三徽外半寸起算則三分損一
得八徽若自十三徽起算則三分損一又有餘以此觀
之唯有宮生徵合三分損益之數其餘三聲非太過即
不及故三分損一近似而非真徵之於宮也偶合三分

損一耳諸聲不可以此為例琴又有時以十徽為角三分損一則復生宮而五聲循環矣然就三分損益之法自前生來終不能使十徽為角也

又論

又以歲日驗之黃鍾當兩歲為四十八氣三分損一為三十二氣除一歲二十四氣餘八氣以八氣減二十四餘十六氣自冬至數之是處暑七月中也而云黃鍾下生林鍾林鍾六月之律已差一月矣又以三十二氣分

為九十六候三分益一百二十八候除一歲七十二候
餘五十六候以減七十二餘十六候自冬至初候數之
是驚蟄二月節後第二候也而云林鍾上生太簇太簇
正月之律又差四候矣以此觀之月之三分損一已是
隔九及其三分益一亦不正得隔八故歲日總無三分
損益之數而律之隔八下生其源已失之於林鍾

又論

或疑聲律三分損益上下相生至其末也復以三分之

則有不盡之算而數不行故聲止於五律止於十二此
似出於自然曰此亦出於人為也蓋其初先知聲之當
五故置一而五三之得八十一為宮之數相生至角六
十四三分之不盡一算而數不行設使其初不知聲之
當五或置一而四三之以二十七為宮則相生至四位
即有三分不盡之算矣或六三之以二百四十三為宮
則至六位而後有不盡之算五位猶可分也律亦猶是
其初先知律之當有十二故自子至亥以三厯十二辰

得十七萬七千一百四十七為黃鍾之實相生至仲呂十三萬一千七十二分之不盡二算而數不行設使其初不知律之當十二不以三厯十二辰則不盡之算

又不如是矣然則此數與法豈果出於自然哉

古厯家謂十九

歲七閏無餘分為一章故立法以九百四十分為一日以二百三十五為小餘此二百三十五者一章之月數也
不知厯者見其積至十九歲果無餘分遂謂九百四十分之日法出於天然不知其先因章月有二百三十五故立為日法非天道果有此數也
後人覺其有差而此數法不可用矣其事正與聲律相類厯則久正之矣
律則鮮有覺其非者

論古時未有三分損益之說

周禮典同曰凡為樂器以十有二律為之數度樂器之長短小大皆以律計其倍半而為之律誠有數有度矣但不知周公以前造律者果如管子史遷之說乎抑別有活法乎伶州鳩曰古之神瞽考中聲而量之以制度律均鍾神瞽目廢而耳聽聲之大小高下自能以耳齊之非專求之度數也即謂度數有成法亦當先為簡徑而後漸為煩曲如今法遞減黃鍾黃均勻截管其法至

簡易徑捷而三分損益一律分之至於千萬其數極為迂曲煩難安知古人造律不即如今日簡徑之法至後人加以巧曲始有管子以下諸說乎管子蓋春秋戰國間人撰自此以前未有三分損益之說唯國語伶州鳩之言有紀之以三一語朱子疑其謂三分損益然韋昭解此以三為天地人則亦未必其果如朱子之說也

論後人嘗破三分損益之說

劉宋時何承天嘗增林鍾以下分數使至仲呂反生復

得黃鍾謂三分損益者其大畧猶厯言斗分四之一此說最為有見然以意增之而涉於牽強則亦難憑明鄭世子謂長律下生短律左旋隔八短律上生長律右旋隔六以勾股算術布之周而復始不用三分損益其云左旋隔八右旋隔六猶是舊法如朝四暮三實無異也勾股算術與此難通亦牽強布算耳豈出於自然乎總之律應十二月隨月迭減而非隔八相生後人雖有議及三分損益者未嘗思其所以失之之由雖有欲破三

分損益者亦不知所以破之之道牽強立法徒勞無當
邢雲路既知三分損益猶厯言斗分四分之一為大畧之
數矣又云後人苟有得不當詆古人立論之非此又不
然易大傳謂著策三百六十當期之日此謂揲法已成
其過揲之策猶有一歲常數之象故大畧言之不必正
與歲實相當若律之三分損益乃是以此立法苟可增
損毫釐則此法數非真與著策之大槩言相當者不同
不可以彼例此也後人果是則古人為非但當論後人

所得者果是與否耳不必猶為古人回護也如是言以
厯比律厯家謂斗分四之一即漢厯太初四分之術也
邢氏何不為之回護而深詆漢人為不知厯乎若曰律
分法由來已久不始於漢則殷周之厯不為不久其失
與太初四分等亦將謂久者即不當詆乎

論仲呂不能反生黃鍾

天地之運晝夜寒暑終則有始獨於律呂之數往而不
反仲呂再生不及黃鍾之九寸此由黃鍾三分損一下

生林鍾即已失之六寸當為夷則而林鍾以進而干其位安能使仲呂反生復於其所京房創為六十律之說仲呂再生別名執始轉生四十八律終於南呂殊為穿鑿何承天劉焯譏房之失增林鍾已下十一律之分使仲呂反生還得黃鍾之實又涉牽強總之拘於三分損益其本已失豈能齊其末今法迭減黃鍾順序而生不曰黃鍾生林鍾而曰黃鍾生大呂不曰仲呂生黃鍾而曰應鍾生半黃鍾豈有不能循環者乎蔡氏亦譏房之

失而取通典變律子聲之說仲呂生變黃鍾以下有六

變律則亦四十八律中執始

子黃

去滅

未林

時息

寅太

結躬

酉南

變虞

辰姑

遲內

亥應

之異名耳

論二變聲

二條

論二變不合於琴

古法五聲之餘於羽宮之間近宮收一聲為變宮角徵之間近徵收一聲為變徵淮南子云姑洗生應鍾比於正音故為和應鍾生蕤賓不比於正音故為謬二變之

說其來久矣然以琴考之殊不然琴絃皆正聲六七絃為宮商之清聲非二變也十三徽至十徽一律一徽是角商各二聲皆非如二變之說也論聲律者當以琴為主琴徽出於天然不從三分損益來者也

論七音非古

周景王問伶州鳩七律對以武王伐殷之初歲月日星

辰所在自鶉及駟為七列

鶉火午宮張宿至天駟凡七宿天駟房也

南北之

揆為七同

自鶉火午至天龜子凡七宮

神人以七同其數而以律和

其聲故謂之七律此但言所以用七之故而不言七律
為何律後又言武王作四樂曰羽曰厲曰宣曰嬴亂用
夷則上宮黃鍾下宮太簇下宮無射上宮又只有四律
而不言七此皆不甚分明韋昭註七律云黃鍾為宮太
簇為商姑洗為角林鍾為徵南呂為羽應鍾為變宮蕤
賓為變徵武王所用七律果如是乎左傳昭公二十年
七音杜預但引國語之文而不用五聲二變之說豈亦
有疑於此者乎杜佑則云古有五聲至周以來加文武

二聲謂之七音此則琴絃少宮少商之說也竊疑此說得之變宮變徵恐周初未嘗有此京房謂伏羲時已有此七音太無稽矣尚書大傳云予欲聞六律五聲八音七始詠說者謂七始即七音然今文尚書作在治忽史記又作來始滑一文而三處不同始治字相近滑忽音相近七在古音亦相近以文義言之皆不若今文尚書之安則尚書其本文而史記書傳皆誤文也以七始為七音郢書燕說豈足信乎

論變律 二條

辨變律半律之非

古法十二律之外但有四清聲而已至唐杜佑通典始有變律子聲之說仲呂再生變黃鍾轉生十二律各半之為子聲其律皆短於正律蔡氏取黃太姑林南應六變律各有半聲有用有不用似非自然之理如當用此律則宜用其正律不能用全律則宜用正律之半聲而已何為舍其正者不用必用其近似不正者乎其所以

然者但拘於三分損益之說謂從正律生來不得本律故輾轉相生皆殺於本律不知三分損益之法人為之耳豈聲音中果有如是之數默寓其間當用變律時必不宜從正律取聲耶

朱子謂漢志黃鍾不為他律後與通典變律之說相發明然黃鍾自

有半律為他宮用亦是為他律後不必又取變黃鍾之半聲也

論范馬未檢通典

朱子甚取通典之說謂他書所不及又謂范蜀公司馬溫公不知檢通典以今觀之二公之論樂其大者未必

得元聲次則十一律之損益未必得本律之正耳至若
通典之說尚有可疑用與不用恐於樂皆無加損也

范主

房庶私增漢書又去四清聲最為純
謬唯律管當用圓分之說有可取之

禮書綱目附錄卷上

欽定四庫全書

禮書綱目附錄卷中

婺源江永撰

論琴

以琴證論古今法

十六條

三分損益之法其來尚矣今以為不然而別為之法得無無徵而不信乎曰是非無徵也古之樂器流傳於今其最古雅而自然者莫如琴以琴證之則古今二法之離合判然於絃徽之間矣蔡氏之書證之於琴而不合

其大者有六按舊法羽宮角徵之間為二變以補其缺
始無遼濶之虞使古之為琴者誠慮此宜以二變間於
正聲之間胡為舍此不用而命第六絃曰少宮第七絃
曰少商此果何說乎其不合者一也

樂工指法或以四絃為蕤賓變徵五

絃為林鍾徵六絃為南呂羽七絃為應鍾變宮見陳旸
樂書此俗工相傳之誤也古法原以初絃中徵應六絃
散聲二絃中徵
應七絃散聲舊法姑洗為黃鍾之角不可稍移易者

琴家宮調却按初絃十徽應三絃散聲十徽位近仲呂

而非姑洗

此據古律言之今
法十徽正當蕤賓

其不合者二也中徽當琴

體之半初絃為黃鍾清聲古人所謂黃鍾之宮清濁之
衷律呂之本者此也黃鍾正宮調於此起調畢曲泛聲
發於此者音獨洪大與他徽異聲以中為貴也蔡氏之
書於黃鍾四寸半之下註曰無謂九分之寸奇零不盡
仲呂反生所不及而旋宮所不用也使其果無而不用
則初絃中徽為虛設矣胡為以泛聲扣之音獨隆隆然
乎其不合者三也三分損益所生之律參差不齊以絃
比管而計其尺寸初絃唯林鍾當九徽南呂當八徽若

太簇則在十三徽之外姑洗則在十一徽之內十三徽則無律二變律則無徽胡為徽律相齟齬乎其不合者四也舊法旋宮一均止用七聲施之編鍾編磬猶可也用之於琴則不然琴每絃皆有三十六聲除太清者不用其餘各因曲調隨宜取聲何嘗限之以七若依蔡氏之法則按徽取聲皆不得出本均之外聲之可用者無幾且黃鍾一均有濁而無清應鍾一均有清而無濁只須彈一兩絃即可成曲調而諸絃諸徽皆無用有是理

乎其不合者五也

嘗試以趙彥肅所傳風雅詩譜按聲彈之只須初絃次絃其餘皆無用其

聲全濁不成韻調可知詩譜之非真其於鹿鳴諸詩黃鍾太簇用清聲猶賴有此兩聲以濟之稍稍可聽若依蔡氏法此二律并不得用清聲法則密矣其如聲不諧於耳何

琴以聲律為體以徽為

用彈者按徽取聲音調自諧次絃以後律漸長而位漸疎至六七絃則半律亦如正律之長故按徽之聲有正當律者有當律之前半後半與中間者如蔡氏之法必須用正用半與夫變律變半律按圖似有條理施之於琴則煩而難用且古琴曲之傳於今者其聲甚美何嘗

拘拘蔡氏旋宮之法乎其不合者六也若如今法則五聲用其均齊者以為體取其應徽者以為用諸律則計尺寸而勻布之中徽既為黃鍾清聲矣十徽為四分絃之三於聲之位當角之中於律正當蕤賓猶一歲之夏至也十三徽為八分絃之七於聲之位當商之近前於律正當夾鍾猶一歲之春分也十二徽為六分絃之五於聲之位當商之近後於律則當姑洗九徽為三分絃之二於聲之位為徽之近前於律則當夷則此皆徽律

正相當者也十一徽為角之近初仲呂當之而稍上八徽為羽之近前無射近之而在右此二徽律不正相當者別有其故後論泛聲中詳之七徽與律相當者五徽差者二相當者其常微差者其變亦可知今律脗合於琴者多矣又因徽之自然者以為五聲之用次絃以下隨其調之高下而進退焉此琴家之本法較之拘於三分損益泥於變聲變律者果孰離而孰合乎後之言律呂者當於古雅自然之器精密考之一洗千餘年沿襲

之說可也

論琴徽泛聲應先天八卦橫圖

琴有十三徽說者但以為象閏而已然以泛聲彈之

左手

微按絃右手擊絃

當徽則泠泠有清音不當徽則啞然無聲則

其位置不可分毫移動此必有所以然之理古今未嘗發明永深思之而得四說其一則應先天八卦橫圖也蓋琴絃四倍黃鍾三尺六寸自龍齧至臨岳七徽為中界自臨岳至七徽以四徽為中界七徽至龍齧以十徽

為中界又自臨岳至四徽以一徽為中界十徽至龍齧以十三徽為中界自一徽至四徽四寸半為上準象黃鍾子聲四徽至中徽九寸為中準象黃鍾中聲中徽至龍齧一尺八寸為下準象黃鍾濁聲重按之取木聲則自尾至首為三段徽按之取泛聲則自首至尾為四段一至四一段也四至七二段也七至十三段也十至十三四段也中兩段倍於前後段又併一徽內十三徽外凡為四寸半者有八儼然有先天八卦橫圖之象焉一

徽內無聲之處乾也一至四兌也四至七離與震也七至十巽與坎也十至十三艮也十三至龍齕無聲之處坤也乾坤老而不用故首尾無聲六子代父母用事故十三徽有聲也首尾雖無聲而聲實出於首尾則乾坤為不用之用猶一家父母雖老畢竟以父母為主也細推之第一徽兌之下畫也二徽兌之中畫也三徽兌之上畫也四徽為兌離之間少女中女相接之處也五徽離之中畫也六徽震之初畫也七徽為震巽之間兩儀

大分界之處也七徽內陽主進畫自下而上七徽外陰
主退畫自上而下八徽巽之下畫也九徽坎之中畫也
十徽為坎艮之間中男少男相接之處也十一徽艮之
上畫也十二徽艮之中畫也十三徽艮之下畫也三男
三女皆用事發聲而少男少女血氣方充為人道生育
之始尤用事故兌艮一畫各發一聲而離震巽坎一卦
止發一聲也且其中尤有微妙者焉二五九與十二徽
皆居本段三分之一三徽却後二分六徽却後四分八

徽却前四分十一徽却前二分不與諸徽均列按之卦
畫皆有至理蓋四徽十徽居兩卦之間三徽當兌之上
畫一陰為兌之主稍却而後不欲近乎離十一徽當艮
之上畫一陽為艮之主稍却而前不欲近乎坎少女中
女同居而志不同行少男中男並處而性不相合也且
兌金也性畏火之鑠艮土也性惡水之濕故各却少許
以避之造化自然之理也五徽正當離之中畫九徽正
當坎之中畫若均布之六徽宜當震之中畫八徽宜當

巽之中畫然離以中畫之陰為主震以下畫之陽為主
故六徽當稍却而後乃得其本位坎以中畫之陽為主
巽以下畫之陰為主故八徽當稍却而前乃得其本位
也且火以木為體木以水為母故震木稍却而後以就
火之炎巽木稍却而前以就水之潤也伏羲八卦橫圖
為作易之始其自然之理數乃見之於琴徽吁妙矣哉

論泛聲應六十四卦橫圖

泛聲既應先天八卦橫圖矣由三畫之卦積至六畫為

六十四卦橫圖又有自然之應者焉一徽內十三徽外
皆無聲乾坤二宮不用也一徽則承乾宮末之地天泰
而接乎兌宮之天澤履也二徽當火澤睽三徽當水澤
節四徽則承地澤臨之後而接乎離宮之天火同人也
五徽當水火既濟六徽當火雷噬嗑七徽當地雷復與
天風姤之間陰陽之大交界也八徽當水風井九徽當
火水未濟十徽則承地水師之後而接乎艮宮之天山
遯也十一徽當火山旅十二徽當水山蹇十三徽終于

地山謙而接乎坤宮之天地否也凡此諸微當兩宮交界之間者則有乾坤之卦不當交界之間者必有坎離之卦乾坤坎離為四正故當此有聲也始承泰天地交也終接否天地不交也中於復姤陽始長陰始生也界於同人與師火之始水之終也少女少男之宮血氣並充水火皆當之中女少男之宮當其水火之交不交而不當其純卦純則不相為用也長男長女之宮火近震水近巽當其近不當其遠遠者先衰也天地之道陽有

餘而陰不足長男猶可生育故六徽當火雷噬嗑泛聲
猶有清音長女天癸先絕故八徽當水風井泛聲全濁
似無聲也又以卦爻細推之二徽當睽之六五三徽若
均布之當節之六三退二位當初九也五徽當既濟之
六二六徽若均布之當噬嗑之九四退四位當初九也
七徽後爻自上而下八徽若均布之當井之六四却後
四位當初六也九徽當未濟之九二也十一徽若均布
之當旅之九三却二位當初六也十二徽當蹇之九五

也兌巽陰宮遇離而止遇坎而却震艮陽宮遇坎而止
遇離而却男女異類宜相避也坎離二宮水火相遇則
各止其所矣此又以卦象人事推之皆有自然之妙焉

論泛聲應節氣

泛聲應卦畫既有自然之理矣抑又有微妙者焉全絃
猶一歲也三尺六寸二十四分之每分一寸有半當一
氣臨岳際則冬至也一徽內四寸半之地有三氣為冬
至小寒大寒以其當冬令陽微之時故無聲一徽當立

春陽氣出地故有聲二徽雨水也三徽驚蟄也四徽春分也五徽穀雨也六徽小滿也七徽夏至也八徽大暑也九徽處暑也十徽秋分也十一徽寒露也十二徽霜降也十三徽立冬也陽氣將入地故聲終於此自此至龍齷四寸半之地為小雪大雪冬至皆閉藏之時故無聲也自春分至秋分一月而一徽自立春至春分秋分至立冬皆一月而兩徽者春初為萬物之始生秋末為萬物之已成故聲獨多也四立之節唯立春立冬有徽

而立夏立秋無徽者立春立冬為陽氣出入之限春夏與夏秋之間陽氣皆在地上非陰陽之大界故無聲也冬至雖無聲而聲皆出於首尾則十三徽之聲皆其聲猶乾元之統天也驚蟄一徽稍却而後寒露一徽稍却而前者驚蟄為木氣之動寒露為金氣之藏陽性常速故未至其地而先有聲陰性常緩故已過其地而後有聲也小滿一徽又却而後大暑一徽又却而前者凡聲音屬金四月金始生畏午火之鑠故却而後六月火氣

盛金正伏故却而前皆金之避火也諸徽泛聲亦有不
同中徽最洪大其聲隆隆然夏至陽極也諸徽稍不當
徽即無聲獨中徽過一指猶有聲陽盛有餘也九徽十
徽最清亮其聲空空然金氣正肅清也一二徽聲細陽
方長也二十三徽聲不甚發陽欲藏也八徽聲最不
揚似無聲然大暑火盛而金伏也吁造化之理微矣哉
抑妙矣哉

論泛聲應納音

泛聲之理以卦畫節氣推之既如此矣又不止是也六十甲子以數定為五行名曰納音其理與聲音相關以琴徽推之亦有默契者焉蓋十三徽分為四段一段中有甲子一周細推其徽位之相當一為甲子二為甲寅三為壬寅四為甲子五為甲申六為壬寅七復為甲子七徽後左右相對八為壬寅九為甲申十為甲子十一為壬寅十二為甲申十三為甲子納音五行甲子壬寅為金甲申為水當金水則有聲也五行成質者金為清

木土則濁矣有氣而未成質者水為清火則濁矣故獨當清者而鳴六十甲子三分之為甲子甲申甲辰若當甲辰則為火其音濁故三徽六徽八徽十一徽皆却至壬寅之位而鳴不與諸徽均列也此泛聲唯金水有聲若於七徽外取本聲則又五行皆全龍齧起甲子十三徽為巳卯土十二徽甲申水十一徽戊子火十徽甲午金九徽甲辰火八徽癸丑木七徽甲子金凡二金二火一土一水一木五行之音皆備第八徽若勻布則當甲

寅水五行缺一故退一位至癸丑木而五行全造化自然之妙如此

總論泛聲

琴必當徽乃有泛聲一絃十三聲七絃九十一聲正如人身動脈頭手足各三部左右十八處當其部切之乃應手否則不應也古今未有言泛聲所以然者今推之乃有四說八卦也六十四卦也節氣也納音也四者殊途而皆可通朱子所謂萬物各具一理萬理同出一原

故推而無不通也既得琴徽之所以然而聲律有確據矣以下乃論取聲布律調絃換調之法

論按徽取五聲

五聲之體雖有定界而五聲之用取諸琴徽初絃十三徽為商十二徽為清商次絃之聲隨調高下而應之下則應十三徽高則應十二徽第十一徽為慢角十徽為正角三絃亦隨調高下而應之下則應十一徽高則應十徽九徽為徵四絃應之八徽為羽五絃應之中徽為

少宮六絃應之次絃中徽為少商七絃應之諸徽泛聲本無五聲之序而按徽取本聲則絃於此取應諸調於此轉換有自然之理焉

又論

舊以太簇八寸為商於琴絃三尺二寸在十三徽外半寸然泛聲至十三徽三尺一寸五分而始發聲則當以十三徽為商蓋十三徽外其聲太濁雖三尺二寸四分之地已交商界必更進九分而後有徽舊法三分徽益

一上生商其如此處無徽何又舊法以姑洗為角其位在十一徽之內然角聲一發於十一徽一發於十徽彈慢角調商以十一徽為角彈宮調者却以十徽為角猶清商調以十二徽為商也舊法唯有姑洗為角故角徵間相去遠不得不有變徵以補其缺角不能再生宮故有變宮以續其斷證之於琴則不合矣

諸絃布律法

諸絃之律各以今律布之布至少少聲而止法如左

一絃

全律

每律減一寸五分

半律

每律減七分五釐

黃

龍韻散聲

大

三尺四寸五分

太

三尺三寸並十三徽外

夾

三尺一寸五分

三徽

姑

三尺十二徽

仲

二尺八寸五分十一徽內二分

蕤

二尺七寸

徽

林

二尺五寸五分十徽九徽之間

夷

二尺四寸九徽

南

二尺

二寸五分

無

二尺一寸八徽內四分

應

一尺九寸五分七徽外

黃

清

中徽

仲清

一尺四寸二分五釐六徽內自七徽以上唯當徽近徽者錄之餘從略後

此徽

夷清

一尺二寸五徽

黃清清

九寸四徽

二絃

全律

每律減一寸七分
分一釐四毫奇

半律

每律減八分
五釐七毫奇

夾

龍齟
散聲

姑

三尺四寸二分
分八釐奇

仲

三尺二寸五分七釐
奇並十三徽外

蕤

三尺八分五釐
奇十三徽內

林

二尺九寸一分四釐奇
十一徽外四分奇

夷

二尺七寸四分奇
十徽外四分奇

南

二尺五寸七分
奇十徽內

無

二尺四寸

徵

九

應

二尺二寸三分弱
九徽八徽之間

黃清

二尺五寸七分
奇八徽內

太清

一尺九寸七分

太清

一尺八寸八分六釐
並七徽外

夾清

中

林清

一尺四寸五分
七釐六徽內

無清

一尺二寸五徽

黃清

清

一尺二分八釐
奇四徽外

二絃

清商調用

全律

每律減一寸八分

半律

每律減九分

姑

龍齟散聲

仲

三尺四寸二分

蕤

三尺二寸四分並十三徽外

林

三尺六分

徽內

十三

夷

二尺八寸八分十一徽外一分

南

二尺七寸十徽

無

二尺五寸二分十徽九徽之間

應

三尺三寸四分九徽內

黃清

二尺一寸六分

外二并七

大清

二尺七分

太清

一尺九寸八分

夾清

一尺九寸八分

徽外

姑清

中徽

夷清

一尺四寸四分六徽內

黃清清

尺一

八分五徽內

三絃

慢角調用

全律

每律減一寸八分八釐奇

半律

每律減九分四釐奇

仲

龍齟散聲
借二分

蕤

三尺三寸
九分奇

林

三尺二寸一釐奇
並十三徽外

夷

三尺一分
二徽外一分

南

二尺八寸二分
奇十一徽內

無

二尺
六寸

三分四釐奇
十徽內六分奇

應

二尺四寸四分
奇九徽外

黃清

二尺二寸五分

奇九徽
八徽之間

太清

二尺一寸六分
奇八徽外

太清

二尺七分
八徽

內

夾清

一尺九寸
七分奇

姑清

一尺八寸八分
奇並七徽外

仲清

一尺七寸八分七釐奇
中徽內一分二釐奇

南清

一尺四寸一分
六徽內

黃清

清

一尺一寸三分
弱五徽內

三絃

宮調用

全律

每律減二寸

半律

每律減一寸

蕤

龍
散聲

林

三
四寸

夷

三
二寸
並十三徽外

南

三
十二徽

無

二
八寸
一徽內七分

應

二
六寸
十徽內

黃清

二
四寸
九徽

太清

二
三寸

太清

二
二寸
並八徽外

夾清

二
一寸
八徽內

姑清

二
尺

仲清

一
九寸
並七徽外

蕤清

中
徽

南清

一
尺

五
寸
六徽外

黃清

一
二寸
五徽

四絃

全律

每
律減二
寸二分半

半律

每
律減一
寸一分二釐半

夷

龍
散聲

南

三
三寸七分
半十三徽外

無

三
一寸五
分十三徽

應

二
九寸二分
半十一徽外

黃清

二
七寸
十徽

太清

二
五寸
八分奇

太清

二尺四寸七分
半並九徽外

夾清

二尺三寸六分
奇九徽內

姑

清

二尺二寸五分
九徽八徽之間

仲清

二尺一寸三分
分奇八徽

蕤清

二尺二分

半

林清

一尺九寸一分
奇並七徽外

夷清

中徽

應清

一尺四寸一分

奇
徽內

黃清

一尺三寸
五徽外

五絃

全律

每律減二寸五分
分二釐三毫奇

半律

每律減一寸二分
分六釐一毫奇

無

龍齟散聲
借六分太

應

三尺二寸八分
奇十三徽外

黃清

三尺二寸太

十二
徽外

太清

二尺九寸奇
十二徽內

太清

二尺七寸七分
奇十徽外

夾清

二尺六寸五分
十徽內五分

姑清

二尺五寸二分
奇十徽外

仲清

二尺三寸九分太

九徽

蕤清

二尺二寸七分奇
九徽八徽之間

林清

二尺一寸

四分奇

八徽

夷清

二尺一分
八釐奇

南清

一尺八寸九分奇
並七徽外

無清

一尺七寸六分六釐奇
中徽內三分奇

黃清清

一尺五寸一分奇
六徽外

五絃

清商蕤賓
調皆用

全律

每律減二寸三分寸之二

半律

每律減一寸三分寸

一之

無應之間

龍齟散聲

應

三尺四寸六分奇

黃清

三尺二寸並十三徽外

太清

三尺六分奇
十二徽外

太清

二尺九寸三分奇
十二徽內

夾清

二尺八寸十一徽內

姑清

二尺六寸六分奇
十徽內

仲清

二尺五寸三分

奇 十徽
九徽之間

蕤清

二尺四寸
九徽

林清

二尺二寸六分
奇 九徽八徽

之
間 夷清

二尺一寸三分
奇 八徽

南清

二尺

無清

一尺八寸
六分奇

並七
徽外

應清

一尺七寸三分
奇 中徽內

黃清清

一尺六寸
六徽外

六絃 黃清與一絃諸律位同

六絃

慢宮
調用

半律

每律減一寸
四分四釐

初絃全律位與此同

應鍾黃清之間

龍韻
散聲

黃清

三尺四寸
五分六釐

大清

三尺
三寸

一分
二釐

太清

三尺一寸六分八釐
並十三徽外

夾清

三尺二分四釐
十二徽

外 姑清

二尺八寸八分
十一徽外

仲清

二尺七寸三分
六釐 十徽外

蕤清

二尺五寸九分二釐
十徽九徽之間

林清

二尺四寸四分
八釐九徽外

夷清

二尺三寸奇
九徽內

南清

二尺一寸六分
八徽外

無清

二尺一分

六釐
八徽內

應清

一尺八寸七分
二釐七徽

黃清清

一尺七寸二分八釐

七徽內

七絃

夾清與二絃諸律位同

七絃

姑清與清商調二絃諸律位同

論布律用六十甲子紀分數

諸絃布律大畧如前法若欲加密當以六十甲子紀其

分數初絃龍齧起甲子之半十三徽當乙卯十二徽當
甲申十一徽當乙丑之近前十徽當甲午九徽當甲辰
八徽當癸丑之近前七徽復當甲子以後又以六十位
布至四徽復當甲子自七徽外一位得三分七徽內一
位得一分半次絃以下各以本徽本位起龍齧亦各如
其絃而伸之位漸疎分數漸多如此則分數皆可考此
未及詳布第言其大略云

論隔絃取聲音

諸絃散而扣之間一絃則應於第十徽而隨調轉絃必
有一絃當退一徽至十一徽然後應皆理勢自然如此
如宮調五絃十徽應七絃散聲四絃十徽應六絃散聲
二絃十徽應四絃散聲初絃十徽應三絃散聲唯三絃
獨退一徽於十一徽應五絃散聲朱子琴律說及答吳
元士書皆深疑此事詳為之說似謂獨退一徽常在三
絃不知此唯宮調調絃則如此若更一調則退徽又在
他絃不常在三絃也宋中興志姜夔樂議其圖說甚明

朱子蓋亦考之不詳耳又蔡西山先生謂琴唯黃鍾一均但絃定七絃以彈十一宮朱子謂季通之說不可行考之姜夔圖說琴須轉絃合調蔡氏絃定七絃之說誠誤矣朱子又謂古人隨月調絃若調至應鍾則絃急恐絕此亦不然古法轉絃合調一調但轉兩三絃非盡取七絃而更之也調之高下絃之緊慢上下不過一律非謂由黃鍾而漸緊以至於應鍾也姜夔圖說言簡而明今因其說推之如左

慢角調絃法

姜夔曰黃鍾大呂並用慢角調故於大絃十一徽應三絃散聲 古大呂比今律短

按慢角調者角絃慢張也此調宮絃退一位取十一徽仲呂角應三絃散聲 三絃仲呂角取十徽內無射羽應五絃散聲 五絃近無射羽取十徽內夾鍾清商應七絃散聲 二絃夾鍾商取十徽外夷則徵應四絃散聲 四絃夷則徵取十徽黃鍾清應六絃散

聲此調諸絃如常唯角絃慢故名

凡徽律差數分者聲相近亦得相應

後倣此

清商調調絃法

姜曰太簇夾鍾竝用清商調故於二絃十一徽應四絃散聲 古太簇今在太夾之間古夾鍾今在夾姑之間

按清商調者商絃高一律也此調宮絃取十徽蕤賓角應三絃散聲 三絃蕤賓角取十徽無射應鍾之間應五絃散聲 五絃無應間羽取十徽內姑洗清

商應七絃散聲 三絃姑洗商取十一徽夷則徵應
四絃散聲 四絃夷則徵取十徽黃鍾清應六絃散
聲 此調商絃緊而五絃七絃亦隨之

宮調調絃法

姜曰姑洗仲呂蕤賓竝用宮調故於三絃十一徽應五
絃散聲 古姑洗今近仲呂古仲呂今近蕤賓古蕤賓
今近林鍾

按宮調者以初絃為主也宮絃取十徽蕤賓角應三

絃散聲 三絃蕤賓角取十一徽內無射羽應五絃
散聲 五絃近無射羽取十徽內夾鍾清商應七絃
散聲 二絃夾鍾商取十徽外夷則徵應四絃散聲
四絃夷則徵取十徽黃鍾清應六絃散聲

慢宮調絃法

姜曰林鍾夷則並用慢宮調故於四絃十一徽應六絃
散聲 古林鍾今為夷則古夷則今近南呂

按慢宮調者大絃與第六絃慢張下半律也宮絃取

十徽仲呂角應三絃三聲 三絃仲呂角取十徽內
無射羽應五絃散聲 五絃近無射羽取十徽內夾
鍾清商應七絃散聲 二絃夾鍾商取十徽外夷則
徵應四絃散聲 四絃夷則徵取十一徽應鍾與黃
鍾清間慢宮應六絃散聲 此調宮絃慢角絃亦如
之而六絃亦慢

蕤賓調調絃法

姜曰南呂無射應鍾竝用蕤賓故於五絃十一徽應七

絃散聲 古南呂今在南無間古無射今在無應間古應鍾今在廣黃間

按蕤賓調者角絃緊當蕤賓位而第五絃亦隨之也此調宮絃取十徽蕤賓角應三絃散聲 三絃蕤賓角取十徽無射應鍾之間應五絃散聲 五絃無應間羽取十一徽內夾鍾清商應七絃散聲 二絃夾鍾商取十徽外夷則徵應四絃散聲 四絃夷則徵取十徽黃鍾清應六絃散聲 古蕤賓近今林鍾若

三絃散聲取今律林鍾則絃太緊恐不可張且二絃夾鍾商太遠而四絃夷則徵太促又於三絃十徽應五絃散聲五絃羽為應鍾則羽宮之間亦太促矣故三絃取角聲當今律之蕤賓更不可移而上古名此調為蕤賓與今法若暗合焉 又按宮調三絃亦是蕤賓但取十一徽應五絃散聲五絃如其位此以十徽應五絃則五絃隨之而緊與宮調異

五調中慢宮調最下慢角調次之宮調為中聲蕤賓

調稍高清商調最高

以今律言之黃鍾大呂太簇用慢角調夾鍾姑洗用清商調仲呂蕤

賓林鍾用宮調夷則南呂用慢宮調無射應鍾用蕤賓調

論四清聲

二條

論四清聲不可去

樂有黃鍾大呂太簇夾鍾四清聲尚矣古者編鍾編磬皆十六枚是十二律如四聲也琴之六七絃雖只少宮少商而諸律清聲皆備且復有少少聲焉又不止四清而已瑟有二十五絃亦諸清聲皆備也四清者宋樂志

以為夷則以下四律為宮使商角不陵僭宮聲然只
有四清而角以後不妨用全律沈括馮元以為唯臣民
不可陵君事物則不必避也黃鍾宮調雖以清黃起調
其間仍用黃鍾全律為君故姑洗角雖用全律亦不為
民陵君也古用四清極有調理原不始於王朴李照范
鎮樂皆去四清不知何以成樂編鍾磬可去四枚管絃
則清聲自具雖欲去之安得而去之乎

論陳暘樂書之疎率

陳氏樂書其主意大約以為先王之樂唯有五聲十二律後世乃有二變四清此皆鄭衛之音凡八音之器皆當去二變四清以復古此耳食之學粗率之見未嘗深思細考其故者也二變誠非自然之理然欲去二變當先去三分損益之說如琴絃之用正聲則二變不待去而自去若不考其所以用二變之由而仍泥三分損益之說則角徵與羽宮之間安得不用二變以補其缺乎至欲去四清尤為不思之甚無論旋宮避陵犯四清不

當去即欲去之而勢亦不可得而去如琴初絃中徽內
皆是清聲次絃中徽外已有清聲五絃則十三徽以內
皆是清聲試問彈琴者唯取全律濁聲乎陳氏謂七絃
琴為害理必去二絃以復舜之五絃試問五絃果無清
聲乎不唯五絃即一絃至中徽已是清聲矣如其說雖
孫登之一絃琴尚多一半為無用寧有是理乎宋太宗加
二絃有九絃琴清聲皆具陳氏謂當益一絃取其倍五
聲獨不思五聲加倍清聲不已居半乎竹聲中簫管篪

笛之屬凡七孔九孔者陳氏皆惡之五孔六孔八孔者
陳氏皆取之謂五孔合五聲六孔合六律八孔合八音
此但欲以數目比擬無異兒童之見不知管笛之屬黃

鍾宮聲皆出中管

諸孔皆閉

五孔者四孔為商角徵羽餘一

孔即是半宮聲六孔者五孔具十一律上一孔必是黃
鍾清非五孔即為五聲六孔即為六律也八孔則四清
皆具矣乃以應八音取之試問一器與八音有何交涉
乎陳氏徒嘖嘖於四清其粗率不思如此彼所據以為

說者但以周禮有凡為樂器以十有二律為之數度一語耳不知半律清聲亦是本律之半未嘗出於十二律之外也善乎翰林學士馮元之駁李照曰前聖制樂取法非一故有十三管之和十九管之巢三十六簧之箏二十五絃之瑟十二絃之箏九絃七絃之琴十六枚之鍾磬各自取義寧有一之於律呂專為十二之數也四清聲之說正為臣民相避以為尊卑今若止用十二數旋相考擊至夷則以下四管為宮之時臣民相越則陳

犯之音作此甚不可者也楊徐之破范鎮曰編鍾編磬
十六其來遠矣不獨見於周禮小胥之說漢成帝時健
為郡於水濱得古磬十六枚帝因是陳禮樂雅頌之聲以
風化天下其事載於禮樂志漢承秦秦未嘗制禮作樂
其稱古磬十六者乃二帝三王之遺法也王朴樂內編
鍾編磬以其聲律太高歌者難逐故四清聲置而不用
及神宗朝下二律則四清皆用而諧協矣今鎮所製匏
竹之器簫必十六管是四清在其間矣自古無十二管

之簫豈簫韶九成之樂已有鄭衛之聲乎此皆說之不可易者李范二家已屬謬見陳氏徒悅乎去鄭復雅之名而不察其實以二家之識為高其未之深思乎

論旋宮 一條

論旋宮有活法

十二律旋相為宮古有是言後人論律講於此者詳矣一均七聲有用正律者有用半律者有用變律與變半律者以此布為八十四聲六十調甚易及其被之管絃

施之金石常齟齬而難行竊意旋宮當別有活法或一均不必限以七聲或徵羽二聲之律不必短於本宮此當與知音者參定未可執一定之圖說膠柱而鼓瑟也

論樂調 三條

辯黃鍾全律起調畢曲之非

樂之有調其理甚微其勢皆出於自然如初一聲為某聲其尾亦是此聲其中曲折皆隨初一聲之高下而抑揚焉調平者衆聲皆隨之而平調高者衆聲皆隨之而

高調下者衆聲皆隨之而下大約太濁太清之聲不可以起調如初一聲太下則其後遇當下之聲更不能抑而管無可吹絃無可彈歌者亦無其聲矣或初一聲太高則其後遇當高之聲更不能揚而管無可吹絃無可彈歌者亦不能及此聲矣故起調之聲必在清濁之間其前更有下於此者其後更有高於此者然後可以抑揚曲折而成曲調焉儒家論樂不知此理謂黃鍾一均皆用正律更無清聲變律雜其間為最純粹是謂初一

聲即用黃鍾全律起調如此則太簇以下六律皆短聲
皆高但有揚而無抑豈能成曲調乎試以管絃驗之笛
家曾有以中管之合字為調首琴家曾有以初絃之散
聲為調首者乎凡雅樂所謂黃鍾清宮俗樂所謂正宮
者皆以半黃鍾清聲起調而非以全律濁聲起調也黃
鍾清聲起調其後更有清聲可以揚其前皆下於調首
可以抑是以能成調也以今笛家俗樂驗之有所謂上
字調者其調平下五孔皆開更高焉則為六字調字譜

皆移上二聲或一聲更下焉則為尺字調字譜皆移下一聲若過乎六字尺字則太高太下不能成調矣雅樂亦相似也宋時雅樂俗樂皆無徵角調但有宮商羽三調而已宮者清宮商者清商皆不用黃鍾大呂太簇夾鍾四濁聲也徽宗使人強為徵調但能以徵聲起而不以徵聲終

見朱子語類

此不知何故或由風氣使然乎由此

觀之雅樂起調之聲未甚下者即不能為焉有黃鍾最

濁之聲而可為者乎

朱子論樂初亦以為黃鍾五調皆以黃鍾正律起調畢曲其後云古

人亦用黃鍾清聲為調前說非是見朱子語類九十二卷輔廣錄注中然則朱子後亦自覺其誤矣蔡氏不習於音不知樂調有自然之理當時趙彥肅傳得唐時鄉飲酒風雅十二詩譜小雅六詩為黃鍾清宮調二南六詩為無射清商調皆以清黃起調畢曲雖其譜未必盡是而用清黃為調自是勢不得不然蔡氏想當見之蔽於黃鍾無半律之說故不肯信耳

再論樂調

或問黃鍾全律既不可起調徵角二聲又不能為調然則十二律之能為調者鮮矣不知隋之萬寶常唐之祖孝孫何以皆能為八十四調乎且周禮三大祭樂但無

商調而有宮角徵羽齊景公時有徵招角招郢中曲有
流徵高漸離易水擊筑有變徵此又何以說乎曰樂聲
有流變而為樂有活法考古者當以意會可也凡樂皆
氣也人亦氣也同在鴻濛一氣之中不得不隨氣運而
遷流如詩文為人聲亦樂之類古之詩文後人不能作
則後世不能為此樂調古人能為之又何足怪乎且古
人為樂當有活法未必如後人之律書一均定用七聲
而徵羽皆不可過宮商也齊之徵招角招未知其聲何

如若郢中之流徵易水之變徵亦俗樂之類後世宴樂
固自有徵調亦不為異也若萬寶常史言其撰樂譜論
八音旋宮之法為八十四調百四十四律其聲淡雅不
為時所好何妄易之今不可考祖孝孫作唐雅樂為四
十八曲八十四調亦不知其果皆應律否大約古人之
能為諸調者當必有活法若如儒家之說即一琴已不能
易一均而況八音皆能旋宮乎

論龜茲琵琶七調

隋史言龜茲人蘇祇婆善琵琶調有七種以其七調勘校七音宜若符契一曰婆陁力華言平聲即宮聲也二曰雞識華言長聲即商聲也三曰沙識華言質直聲即角聲也四曰沙侯加濫華言應聲即變徵聲也五曰沙臘華言應聲即徵聲也六曰般瞻華言五聲即羽聲也七曰侯利蓬華言斛牛聲即變宮聲也鄭譯因習而彈之始得七聲之正按此則西域亦有七音然其語與華異未必果合於五聲二變也琴家却只有五調慢宮慢角

之類張琴有緊慢何以不能為七調乎慢宮調有似於變宮蕤賓調却是角聲之高者不得謂之變徵然則西域之七調未必果合七音其所謂沙侯加濫調安知非角聲之高者乎

論造律 三條

論造律以聲和為主

制律求聲氣之元事之最難者也黃鍾之管冥符天道若不可以毫釐差然其分數甚微非人所能察使有天

生自然之律管則可若出於人為安能使其無毫釐之
差竊謂造律必須善審音者聽之聲和為主聲既和矣
雖有小差於樂亦無大害譬如工人製琴製笙製簫笛
者其分寸豈能畫一哉吹之彈之而聲和焉斯為善器
矣邢雲路論之最當特載之

邢曰古樂既亡欲求聲器者宜何施而可亦唯依古

以千二百黍求長九寸空圓九分之管使其和也則已
如有不和必其黍之顆與管之分未當也則惟本吾之
平其心易其氣徐聽人聲之高下上下考之以求其中
聲蓋人之聲無古今一也古尺之分寸與黍之大小不
可考矣即今上黨之黍有大者次者不一安知古所用
者為何等黍又安知其律之分寸視後代何尺為當哉

但以人聲察之以耳聰審之以九寸千二百黍約之斯可矣程子曰黃鍾之聲亦不難定世自有知音者將上下聲考之既得正便將黍實其管看管實得幾粒然後推而定法可也張子曰律呂有可求之理德性淳厚者必能知之朱子曰樂之為教今無師授當立一學樂學使士大夫習之必有精通者出三說皆探本之論也

論人身取律寸法

古之尺寸雖出於律而制字之意則皆本於人身人身中指第二節其內兩紋相距為寸醫家鍼灸量人穴道所謂同身寸者取諸此也今人伸大指與食指為五寸張兩手為五尺古法以張兩手為一尋然則今之五尺

當古之八尺今之五寸當古之八寸而古之一尺當今
工人尺六寸二分五釐也以中指第二節內紋為一寸
者度之自中指端至掌後第二節橫紋而九寸至第三
節橫紋而一尺然則古之黃鍾九寸即今人中指端至
掌後第二節橫紋之度也雖人有高下手指有長短以
中人量之相去蓋不甚遠是則一伸掌而黃鍾之廣瞭
然如在目前矣夫律寸天生也人身之寸亦天生也二
者當不約而同與其求之於古尺古器求之於縱黍橫

黍荒遠者無稽紛紜者難信曷若求之中人之手腕指
節為最近而可據者乎夫律數精微雖未可執此一途
以求合唯以人身之寸為主而更以古器古法參互而
審定之雖不中或亦不遠乎

論人聲合管聲

人聲之有宮商角徵羽也其別有四有一韻具五聲者
字音出於喉為宮出於舌為商出於牙為角出於齒為
徵出於唇為羽即切韻三十六字母之分屬喉舌牙齒

唇與半舌半齒是也有一韻屬一聲者其韻合口呼之
為宮開口呼之為商張牙呼之為角齊齒呼之為徵聚
吻呼之為羽如公韻屬宮岡韻屬商是也又一韻之中
重濁之字為宮商輕清之字為角徵羽如彈琴操者遇
重濁之字則彈重濁之聲以應之遇輕清之字則彈輕
清之聲以應之是也又有同是一字隨其曲調之高下
而歌之遇高調則此字聲高遇平調則此字聲平遇低
調則此字聲低則一字皆可為宮商角徵羽也樂以人

聲為主人聲出於喉猶管聲出於管中造律者欲求聲氣之元既酌乎分寸之度空圍之量更以人聲參定之可也

論候氣二條

論候氣不可信

律管固有冥符天道之理然欲埋之於地以候氣恐不可信天氣一而地氣殊雖使律之長短廣狹皆如法其能一一氣應灰飛耶事未經目驗不敢臆斷也邢雲路

亦深疑此事云

錄袁黃候氣法

明袁黃號了凡通律歷之學所著有歷法新書關中李世達為之作序中間有與張江陵論候氣五不合之說頗有理此事史不載又不見於他書僅見此序而已永恐久而失墜特錄之以備言律學者考覈其言依法候之而飛灰皆應未知果有此否也

李序云昔張江陵傲睨一世無所許可獨

折節於了凡延為諸子師江陵自謂深明律學命官依古法造三層密室又依蔡氏多截管以候氣不應請袁

往視之復命曰候之室宜擇清靜間曠之地今瓦礫叢積則地氣不清一不合也築室三層專固地氣耳故外室之牆掘地三尺而築之二層木室之坂宜入地一尺六寸三層室入地七寸六分今皆不然止可封地上之氣而不可封地中之氣二不合也外室之門宜向子第二層門宜向午第三層門復向子所以反復而固氣也今皆向午三不合也聲氣之元奇之象數厥有自然之理必心探造化之秘者始可制器詣聲不然求之累黍酌之古器皆不可廢今觀所截諸管大小不倫四不合也天地之形常相參差故天之午常偏於丙上二分五釐今日圭所測是也地之午常偏午上二分五釐冬至候黃鍾之宮宜埋壬子之中一室只有一位豈可多截管乎五不合也由是託之擇地於天壇之南隅依法候之而飛灰皆應張甚喜欲委之正樂表請先改厯法語不合遂稱疾求歸歸未幾而張變作矣

律呂餘論 四條

聲音自有流變

凡聲氣也人亦氣也同在一氣之中其勢自有流變非人之所能禦古樂之變為新聲亦猶古禮之易為俗習其勢不得不然今人行古禮有不安於心者則聽古樂亦豈能諧於耳乎耳不諧則神不洽神不洽則氣和不洽和亦何貴於樂若曰樂者所以事神非徒以悅人則亦不然凡神依人而行人之所不欣暢者神聽亦未必

其和平也故古樂難復亦無庸強復但當於今樂中去其粗厲高急繁促淫蕩諸聲節奏紆徐曲調和雅稍近乎周子之所謂淡者焉則所以歡暢神人移風易俗者在此矣若不察乎流變之理而欲高言復古是猶以人心不安之禮強人以必行也豈所謂知時識勢者哉

俗樂可求雅樂

俗樂以合四一上勾尺工凡五六十字為譜十二律與四清聲皆在其中隨其調之高下而進退焉所謂雅樂

亦當不出乎此為雅樂者必深明乎俗樂之理而後可求雅樂即不能肆及於此者亦必與俗樂工之稍知義理者參合而圖之未有徒考器數虛談聲律而能成樂者也宋世制樂諸賢惟劉几知俗樂常與伶人善笛者遊其餘諸君子既未嘗肆其事又鄙伶工為賤技不足與謀則亦安能深知樂中之曲折哉判雅俗為二途學士大夫不與伶工相習此亦從來作樂者之通患也

樂器不必泥古

聲寓於器器不古雅則聲亦隨之然天下事今不如古者固多古不如今者亦不少古之笙用匏今之笙用木匏音劣於木則何必拘於用匏而謂八音不可缺一乎古之木聲用柷敔後世節樂用拍板而雅樂猶用柷敔柷敔之音粗厲拍板之音清越則亦何必不用拍板乎後世諸部樂器中擇其善者用之可也

度量權衡不必泥古

古法度量權衡皆受法於黃鍾天下皆欲其齊同古之

度量權衡相去不甚遠故齊之猶易後世度量長量大權重與古懸殊民間用之既久勢難改易千里之內三者必不能同而民俗便之遠方之懋遷者正因度量衡之同而計其錙銖以收贏餘之利則不同不足為病正所以為利也宋政和間作大晟樂以律尺及斗斛秤新式頒行天下限以月日令天下盡毀舊器不從令者許民首告其擾民不已甚乎後之作樂者律成而制三器藏之內府以備他日之校勘可也若民間所用固當聽從

民便毋斤斤於法古似亦事勢之宜焉已

禮書綱目附錄卷中

欽定四庫全書

禮書綱目附錄卷下

婺源江永撰

深衣考誤

深衣

鄭氏曰深衣連衣裳而純之以采者 孔氏正義曰
所以稱深衣者以餘服則上衣下裳不相連此深衣
衣裳相連被體深邃故謂之深衣

永按深衣之義鄭注孔疏皆得之獨其裳衽之

制裁布之法與續衽鉤邊之文鄭氏本不誤而
疏家皇氏熊氏孔氏皆不能細繹鄭說遂失其
制度後儒承譌襲舛或以臆為之考辯愈詳而
誤愈甚其失自玉藻疏始今為考訂如左

玉藻曰深衣三袪縫齊倍要

縫音逢齊音
咨要一遙反

鄭氏曰三袪者謂要中之數也袪尺二寸圍之為二
尺四寸三之七尺二寸縫紩也紩下齊倍要中齊丈
四尺四寸

疏曰袪謂袂末言深衣之廣三倍於袂末齊謂裳之下畔要謂裳之上畔言縫下畔之廣倍於要中之廣謂齊廣一丈四尺四寸要廣七尺二寸又曰云三之七尺二寸者按深衣云幅十有二以計之幅廣二尺二寸一幅破為二四邊各去一寸餘有一尺八寸每幅交解之濶頭廣尺二寸狹頭廣六寸此寬頭嚮下狹頭嚮上要中十二幅廣各六寸故為七尺二寸下齊十二幅各廣尺二寸故為一

大四尺四寸

永按深衣者聖賢之法服衣用正幅裳之中幅亦以正裁惟衽在裳旁始用斜裁古者布幅濶二尺四寸深衣裳用布六幅裁為十二幅其當裳之前後正處者以布四幅正裁為八幅上下皆廣一尺一寸各邊去一寸為縫一幅上下皆正得九寸八幅七尺二寸其在上者既足要中之數矣下齊當倍於要又以布二幅斜裁為四

幅狹頭二寸寬頭二尺各去一寸為縫狹頭成
角寬頭得一尺八寸皆以成角者向上以廣一
尺八寸者向下則四幅下廣亦得七尺二寸合
於齊得一丈四尺四寸此四幅連屬於裳之兩
旁別名為衽下文衽當旁是也深衣裳裁縫之
法本如此玩下文鄭注可見疏家不得其說妄
謂六幅皆用交解狹頭去邊縫廣六寸濶頭去
邊縫廣一尺二寸於是裳之前後惟中縫正直

其餘皆成奇衰不正之縫可謂服之不衷曾謂
聖賢法服而有是哉下文衽當旁疏及續衽鉤
邊諸說之紛拏皆由六幅皆交解之說誤之耳
衽當旁

鄭氏曰衽謂裳幅所交裂也凡衽者或殺而下或殺
而上是以小要取名焉衽屬衣則垂而放之屬裳則
縫之以合前後上下相變

永按衽者斜殺以掩裳際之名深衣裳前後當

中者不名衽唯當旁而斜殺者名衽故經云衽
當旁明其不當中也當中則前襟而後裾是也
鄭云衽謂裳幅所交裂也玩所之一字明其唯
在裳旁而名衽者交裂其餘幅不交裂也交裂
者以布二幅交解為四幅狹頭二寸去邊縫成
角寬頭二尺去邊縫一尺八寸也又云凡衽者
或殺而下或殺而上此廣解凡裳之衽也衽有
二朝服祭服喪服皆用帷裳前三幅後四幅裳

際不連有衽掩之用布交解寬頭在上合縫之
狹頭在下如燕尾之形即喪服篇衽二尺有五
寸是也此衽之殺而下者也深衣之衽當裳旁
亦交解而以狹頭向上寬頭向下此衽之殺而
上者也云是以小要取名焉者謂棺上合縫之
木亦名為衽也喪大記曰君蓋用漆三衽三束
鄭注云衽小要也蓋小要之形上下廣而中狹
以掩棺蓋合縫之際上半則殺而下半則殺

而上似衣衾之上殺下殺以掩裳際是以有衾
之名此借衣衾名小要故鄭連及之也云衾屬
於衣則垂而放之謂朝祭喪服之衾云屬於裳
則縫之以合前後即此深衣之衾也其縫之以
合前後者唯左旁為然若右旁則不能縫合別
有鈎邊見深衣篇鄭亦畧言之耳此經與鄭注
甚明又以他文證之問喪云扱上衾謂裳之兩
角插於帶間也論語云左衽謂夷俗衾掩於左

其縫合者在右也皆衽當旁之證也而疏家忽之并失小要之義

疏曰衽謂裳幅所交裂也者裳幅下廣尺二寸上

濶六寸狹頭嚮上交裂一幅而為之

按裳幅不皆交裂孔氏誤

謂二二幅皆交裂是未繹所字之意

云凡衽者或殺而下或殺而上

者皇氏云言凡衽非一之辭非獨深衣也或殺而

下謂喪服之衽廣頭在上狹頭在下

按朝祭服亦如喪服之制

皇氏不及朝祭服非也

或殺而上謂深衣之衽寬頭在下狹

頭在上云是以小要取名焉者謂深衣與喪服相

對為小要兩旁皆有此衽

按小要者棺上合縫之木也皇說誤

熊氏

大意與皇氏同或殺而下謂朝祭之服耳

按熊氏又不及

喪服亦非也合皇熊二說乃備

云衽屬衣則垂而放之者謂喪服

及熊氏朝祭之衽

按此說是

云屬裳則縫之以合前後

者謂深衣之衽云上下相變者上體是陽陽體舒

散故垂而上下體是陰陰主收斂故縫而合之

按此

皆得之

今刪定深衣之上獨得衽名不應假他餘服

相對為衽何以知之深衣衣下屬幅而下裳下屬

幅而上相對為衽

按喪服篇明言衽二尺有五寸孔氏乃謂深衣獨得衽名何耶

殺上殺下明是與他服相對孔氏乃謂深衣衣下屬幅而下裳下屬幅而上相對為衽衣下屬幅何以謂之殺耶且下文衽屬衣則垂而放之豈得謂深衣之衽耶刪定之說大失鄭注之意也鄭

注深衣鉤邊今之曲裾則宜兩邊而有也

按鉤邊別是一

物此經未及深衣疏一旁有曲裾此云宜兩邊有與彼疏亦自相抵牾

但此等無文

言之且從先儒之業

深衣云續衽鉤邊

鄭氏曰續猶屬也衽在裳旁者也屬連之不殊裳前後也鈎讀如烏喙喙必鈎之鈎鈎邊若今曲裾也

永按續衽謂裳之左旁縫合其衽也鈎邊謂裳之右旁別用一幅布斜裁之綴於右後衽之上使鈎而前也漢時謂之曲裾蓋裳後為裾綴於裾曲而前故名曲裾也所以必用鈎邊去裳之右畔前後衽不合若無鈎邊則其行步之際露則後衽之裏有鈎邊而後可揜裳際也鄭氏特引

引孝經援神契烏喙必鉤之鉤讀如之明其為
鉤曲之義使非別綴一幅曲而前不得謂之鉤
也裳十二幅象十二月又有鉤邊其以象閏歟
鄭氏不言左續衽右鉤邊者衣裳自左揜右左
可連右不可連其事易明故不必言左右也續
衽鉤邊之義鄭注分明疏家汨之後儒之說并
鉤邊失之詳見後

疏曰衽為深衣之裳以下濶上狹謂之為衽

按裳幅不

皆下濶上狹 接續此衽而鉤其旁邊即今之朝服
說已見前

有曲裾而在旁者是也 按此說似合續衽鉤邊而一之若兩旁皆續衽而鉤

邊者其說誤矣 又曰衽當旁者凡深衣之裳十二幅皆寬

頭在下狹頭在上 按此說甚誤前已辨之 皆似小要之衽 按小

要上半殺而下半殺而上須合他衽之殺而下者方似小要 是前後左右皆有

衽也今云衽當旁者謂所續之衽當身之一旁非

謂餘衽悉當旁也 按裳幅當前後者不名衽安得有餘衽經明言衽當旁安得謂

前後左右 云屬連之不殊裳前後也若喪服其裳
皆有衽

前三幅後四幅各自為之不相連也今深衣裳一

旁則連之相著一旁則有曲裾掩之與相連無異

故云屬連之不殊裳前後也

按一旁連之相著謂在左者也一旁有曲

裾掩之謂在右者也此二句分明最為得之然又云與相連無異故云屬連之不殊裳前後恐非鄭注之意續衽鉤邊鄭氏分別言之右邊曲裾掩裳際不可謂屬連之也云若今曲裾

也鄭以後漢之時裳有曲裾故以續衽鉤邊似漢

時曲裾今時朱衣朝服從後漢時帝所為則鄭云

今曲裾者是今朝服之曲裾也

按孔氏玉藻疏謂曲裾兩邊宜有似

唐時朝服有兩曲裾然一以經文繹之一邊既續衽則曲裾惟宜施於右耳

家禮深衣制度云衣全四幅其長過脇下屬於裳

註云用布云幅中屈下垂前後共為四幅如今之直領衫但不裁破腋下其下過脇而屬於裳處約圍七尺二寸每幅屬裳三幅

永按深衣之領自左而掩於右前襟亦自左掩右右襟有表有裏則前後當有五幅如後世之袍制而家禮謂衣前後四幅如今之直領衫恐

誤矣家禮深衣圖亦是兩襟相掩既相掩則領不直而衣不止四幅豈朱子未定之說乎又云每幅屬裳三幅亦沿舊說之誤前後四幅每幅屬裳二幅而衽之四幅在兩旁衽之上頭但有角屬於衣前襟之裏一幅則有曲裾屬之耳裳交解十二幅上屬於衣其長及踝

註云用布六幅每幅裁為二幅一頭廣一頭狹狹頭當廣頭之半以狹頭向上而連其縫以屬於衣其屬

衣處約圍七尺二寸每三幅屬衣一幅其下邊及踝處約圍丈四尺四寸

永按孔氏誤釋玉藻裳幅皆交解家禮遂承其誤當以玉藻衽當旁鄭注為正又按深衣篇制十有二幅以應十有二月鄭注云裳六幅幅分之以為上下之殺此注亦略言裳以六幅分為十二幅下齊廣於要中耳其為上下之殺者在當旁之衽非謂十二幅皆殺也

又云方領

註云兩襟相掩衽在腋下則兩領之會自方

永按深衣云曲袷如矩以應方注袷交領也古者方領如今小兒衣領孔疏云鄭以漢時領皆向下交垂方領似今擁咽故云若小兒衣領但方折之也司馬溫公引後漢馬援傳朱勃衣方領能矩步註謂頸下別施一衿映所交領使之方正又引後漢儒林傳服方領註方領直領也

左傳衣有禮註禮領會也曲禮註衿交領也謂領之交會處自方即謂衿疑更無他物朱子此說蓋從溫公後說也鄭氏謂如今小兒衣領豈漢時小兒衣領亦但曲之而自方非如孔氏擁咽之說乎但領既交會則不直而在右之前襟必有表裏前謂布四幅不知何以制之也

曲裾

註云用布一幅如裳之長交解裁之如裳之制但以

廣頭向上布邊向外左掩其右交映垂之如燕尾狀
又稍裁其內旁大半之下令漸如魚腹而末為鳥喙
內向綴於裳之右旁禮記深衣續衽鉤邊鄭註鉤邊
若今曲裾

永按曲裾別用一幅布裁之綴於裳之右旁是
已然謂交解裁之廣頭向上左右交映垂之如
燕尾狀則似朝服祭服喪服之衽非鉤邊之制
也鄭注讀如鳥喙必鉤之鉤此引孝經緯文明

鈎字之義非謂末為鳥喙也此條朱子後自有說

蔡氏淵曰司馬所載方領與續衽鈎邊之制引證雖詳而不得古意先生病之常以理玩經文與身服之宜而得其說謂方領者只是衣領既交自有如矩之象謂續衽鈎邊者只是連續裳旁無前後幅之縫左右交鈎即為鈎邊非有別布一幅裁之如鈎而綴於裳旁也方領之說先生已修之家禮

矣而續衽鉤邊則未及修焉

永按續衽鉤邊朱子前後有三說謂別布一幅裁之如鉤綴於裳之右旁此家禮之說也謂左邊既合縫了再覆縫以合縫者為續衽覆縫為鉤邊此衣圖之說也謂是連續裳旁無前後幅之縫左右交鉤即為鉤邊此蔡氏所聞之說也三說似皆未確其源皆由孔氏釋玉藻誤之使其不謂六幅皆交解則當旁之衽左邊連屬之

右邊必須有別布一幅為曲裾以掩之非如合縫覆縫左右交鉤之說矣其有別布一幅也亦但綴於裳之後裾鉤曲而前非如交裁為燕尾之說矣

楊氏復曰深衣制度唯續衽鉤邊一節難考按玉藻深衣疏皇氏熊氏孔氏三說皆不同皇氏以喪服之衽廣頭在上深衣之衽廣頭在下喪服與深衣二者相對為衽孔氏以衣下屬幅而下裳上屬

而上衣裳二者相對為衽此其不同者一也

按二說孔

氏失之皇氏但失不兼朝祭服耳

皇氏以衽為裳之兩旁皆有孔

氏以衽為裳之一邊所有此其不同者二也

按孔氏謂

所續之衽當身之一旁非謂衽為裳之一邊所有也

皇氏所謂廣頭在上為

喪服之衽者熊氏又以此為朝祭服之衽一以為

吉服之衽一以為凶服之衽此其不同者三也

此按

非不同也皇熊各舉一邊耳

家禮以深衣續衽之制兩廣頭向

上似與皇氏喪服之衽熊氏朝祭服之衽相類此

為可疑是以先生晚歲所服深衣去家禮舊說曲

裾之制而不用

按鄭氏解鉤邊為曲裾分明別有一物但非如燕尾下垂耳去而不

用恐乖鄭義

蓋有深意恨未得聞其說之詳也及得蔡

淵所聞始知先師所以去舊說曲裾之意後又取

禮記深衣篇熟讀之始知鄭注續衽二字文義甚

明特疏家亂之耳

按續衽與鉤邊是二事鄭注分言之而楊氏即以續衽當鉤邊

是誤讀鄭注耳

按鄭注曰續猶屬也衽在裳旁者也屬連

之不殊裳前後也

按鄭註別解鉤邊為曲裾此獨刪去何也鄭註之意

蓋謂凡裳前三幅後四幅夫既分前後則其旁兩

幅分開而不相屬唯深衣裳十二幅交裂裁之皆

名為衽

按此沿孔疏之誤

見玉藻衽當旁註

按鄭註衽謂裳幅所交裂

也言唯衽之四幅交裂其餘八幅則不交裂也楊氏亦未細繹鄭註耳

所謂續衽者

指在裳旁兩幅言之謂屬連裳旁兩幅不殊裳前

後也

按屬連之者裳之左旁也若右旁兩幅各開是以別有曲裾以掩裳際楊氏但言裳旁不

辨左右則右邊豈可屬連乎

疏家不詳考其文義但見衽在裳

旁一句意謂別用布一幅裁之如鉤而垂於裳旁

妄生穿鑿紛紛異同愈多愈亂

按孔疏深衣裳一
旁連之相著一旁

則有曲裾掩之二句最分明的確鄭註既解鉤邊
為曲裾則安得混鉤邊於續衽而謂非別用一幅

布為自漢至今二千餘年讀者皆求之於別用一

幅布之中而註之本義為其掩蓋而不可見

按鉤
邊別

用一幅布正得鄭註之意唯玉藻疏誤謂深衣裳
皆名衽十二幅皆交解於是註之本義為其掩蓋
而不可見耳夫疏所以釋註也今推尋鄭註本文其義

如此而皇氏熊氏等所釋其謬如彼皆可以一掃

而去之矣

按皇熊之
說未嘗謬

先師晚歲知疏家之失而未

及修定愚故著鄭註於家禮深衣曲裾之下以破
疏家之謬且以見先師晚歲已定之說云


永按楊氏之說雖謂以鄭註破疏家之謬而玉
藻衽當旁之經文及鄭註衽謂裳幅所交裂也
所字之意未嘗細玩又引深衣續衽鉤邊之註
但及其釋續衽者而遺其曲裾之說於是疏說
本不誤者以為誤而其真誤如孔氏所謂裳幅
皆交解者反忽之甚矣註疏亦未易讀也深衣

裳之誤已久以聖賢法而反類於奇裳不正是
以詳為之考侯當世君子論定焉


--	--	--	--	--	--	--	--

深衣裁布圖

裁衣正身圖




裁袂與袪圖



布一幅闊二尺二寸長約四尺四寸中屈而下
垂為衣之左畔前後幅兩邊各去一寸為縫下
亦各去邊縫。右畔布幅亦如之。

裁前右外襟圖




又布一幅長約二尺二寸闊二尺二寸其
上漸裁之皆各去邊
縫以為右前之外襟
○家禮衣以二幅中
屈為四幅有前無此
外襟其何以掩內襟
乎

又布一幅亦如衣
左右畔之長湖中
屈之皆各去邊縫
屬於衣之左幅其
外漸裁之以為左
袂袂之口為袪徑
一尺二寸兩面二
尺四寸。右袂與
袪亦如之。

又有曲袷廣二寸兩面四寸
又衣之右邊與袂裳之右邊
及下邊皆有緣蓋以緇為之
用績用青用素詳見深衣篇


深衣裁布圖

裁裳前襟後裾圖




布一幅正裁為兩幅上下皆濶一尺一寸
 兩邊各去一寸為縫每幅上下皆濶九寸
 凡用布四幅裁為八幅各去邊縫一寸
 八幅上下皆濶七尺二寸為裳之前襟後裾

裁裳袪圖



布一幅支解為兩幅揆頭濶二尺寬頭濶二尺兩邊各去一寸為
 縫揆頭成角寬頭一尺八寸。凡用布二幅裁為四幅各去邊縫
 一寸以成角二頭向上二尺八寸二頭向下為兩旁之袪

裁鈎邊圖



鈎邊無明文大約如此裁之各去邊縫
 其斜殺一邊綴於右後袪上頭狹處縫
 著於衣之右內襟


附小要圖

小要


棺上合縫之木曰小
 要亦名袪上半殺而
 下象帷裳之袪下半
 殺而上象深衣裳之
 袪

深衣前圖


袂尺二寸圓之二尺四寸 緣袂緣衣裳皆廣一寸半



深衣後圖




舊說深衣裳裁布圖



六幅裁為十二幅皆如此交
解各去邊縫一寸狹頭六寸
寬頭一尺二寸縫為裳


舊說深衣裳圖



前後皆如此
縫之裳幅皆
奇衣不正

又誤謂裳
幅皆名衽

家禮深衣前圖



圖有五誤裳幅斜裁
不與焉

縫合此處謂之續衽鉤連


裳前後共十二幅

續衽鉤連

按此衣裳未掩之圖也然而圖之誤有五衣右畔有外襟內襟其內襟不連裳外襟連裳與衽并左共六幅而此圖左襟三幅右襟三幅則中間不能掩右一誤也裳後中幅不開而此離之二誤也衣裳內邊不緣而此緣之三誤也兩邊皆續衽鉤連四誤也曲衽直上後懸空不著背五誤也


家禮深衣後圖

前已背不裕
見說著誤



按鉤邊之說法
鄭義詳見考誤

家禮著深衣前兩襟相掩之圖



按此圖甚誤裳後既有六幅則前襟之左掩右也亦必有六幅此謂左襟三幅在外則右襟三幅重疊掩於內道前後計之要中只有五尺四寸下齊只有一丈八寸矣前圖幅狹此圖幅忽濶亦無是理也

深衣考誤終

禮書綱目附錄卷下